

大般涅槃经

(三十六卷：第二十二卷至第二十四卷)

北凉天竺三藏昙无讖译 梵

宋沙门慧严慧观同谢灵运再治



南無本師釋迦牟尼佛

说明

本简体校正版《大般涅槃经》（南本）电子书，是根据《乾隆大藏经》大乘涅槃部，第 0110 部，北凉天竺三藏昙无讖译梵、宋沙门慧严慧观同谢灵运再治《大般涅槃经》(36 卷)影印本校正的。标点符号仅供参考。

为了便于读诵，本电子书按顺序每三卷合为一册，共十二册。若每天读一册，可十二天读完。

本电子书是免费结缘品。特此说明。

仁慧草堂

二〇一八年十月

目 录

起诵仪	- 1 -
香赞	- 1 -
开经偈	- 1 -
大般涅槃经卷第二十二	- 2 -
高贵德王菩萨品第二十二之四	- 2 -
大般涅槃经卷第二十三	- 29 -
高贵德王菩萨品第二十二之五	- 29 -
大般涅槃经卷第二十四	- 62 -
高贵德王菩萨品第二十二之六	- 62 -
结诵仪	- 82 -
补阙真言	- 82 -
发愿文	- 82 -
回向偈	- 83 -
回向偈	- 83 -
三皈依	- 84 -

● 起诵仪

香赞

(一遍)

炉香乍爇. 法界蒙薰. 诸佛海会悉遥闻. 随处结祥云. 诚意方殷. 诸佛现全身.

南無香云盖菩萨摩诃萨 (合掌三称)

南無本师释迦牟尼佛 (合掌三称)

开经偈

(一遍)

无上甚深微妙法 百千万劫难遭遇
我今见闻得受持 愿解如来真实义

大般涅槃经卷第二十二

北凉天竺三藏昙无讖译 梵

宋沙门慧严慧观同谢灵运再治

高贵德王菩萨品第二十二之四¹

“复次，善男子，云何菩萨摩訶萨修大涅槃成就具足第二功德？”

“善男子，菩萨摩訶萨修大涅槃，昔所不得而今得之，昔所不见而今见之，昔所不闻而今闻之，昔所不至²而今得至，昔所不知而今知之。

“云何名为昔所不得而今得之？所谓神通，昔所不得而今乃得。通有二种：一者，内；二者，外。所言外者，与外道共。内复有二：一者，二乘；二者，菩萨。菩萨修行大涅槃经所得神通，不与声闻、辟支佛共。云何名为不与声闻、辟支佛共？二乘所作神通变化，一心作一，不得众多；菩萨不尔，于一心中则能具足现五趣身。所以者何？以得如是大涅槃经威神³力故。是则名为昔所不得而今得之。

¹ 大正藏：光明遍照高贵德王菩萨品之四

² 大正藏：到（后同）

³ 大正藏：之势；永乐北藏及龙藏：威神

“又复云何昔所不得而今得之？所谓身得自在、心得自在。何以故？一切凡夫所有身心不得自在，或心随身，或身随心。云何名为心随于身？譬如醉人，酒在身中，尔时身动，心亦随动；亦如身懒，心亦随懒，是则名为心随于身。又如婴儿，其身稚小，心亦随小；大人身大，心亦随大。又如果有人身体粗涩，心常思念欲得膏油润渍令软。是则名为心随于身。云何名为身随于心？所谓去、来、坐、卧修行施、戒、忍辱、精进，愁恼之人身则羸悴，欢喜之人身则肥悦⁴，恐怖之人身体战动，专心听法身则怡怿⁵，悲苦⁶之人涕泪横流，是则名为身随于心。菩萨不尔，于身、心中俱得自在，是则名为昔所不得而今得之。

“复次，善男子，菩萨摩訶萨所现身相犹如微尘，以此微身悉能遍至无量无边恒河沙等诸佛世界无所障阂⁷，而心常定，初不移动，是则名为心不随身，是亦名为昔所不至而今能至。

“何故复名昔所不至而今能至？一切声闻、辟支佛等所不能至，菩萨能至，是故名为昔所不至而今能至。一切声闻、辟支佛等虽以神通，不

⁴ 大正藏：鲜

⁵ 大正藏：悦

⁶ 大正藏：泣

⁷ 大正藏：碍

能变身如细微尘，遍至无量恒河沙等诸佛世界。声闻、缘觉身若动时，心亦随动；菩萨不尔，心虽不动，身无不至，是名菩萨心不随身。

“复次，善男子，菩萨化身犹如三千大千世界，以此大身入一尘身，其心尔时亦不随小。声闻、缘觉虽能化身令如三千大千世界，而不能以如此大身入微尘身，于此事中尚自不能，况能令心而不随动？是名菩萨心不随身。

“复次，善男子，菩萨摩訶萨以一音声，能令三千大千世界众生悉闻，心终不念：‘令是音声遍诸世界，使诸众生昔所不闻而今得闻。’而是菩萨亦初不言：‘我令众生昔所不闻而今得闻。’菩萨若言‘因我说法令诸众生不闻闻’者⁸，当知是人终不能得阿耨多罗三藐三菩提。何以故？众生不闻我为说者，如此之心是生死心，一切菩萨是心已尽，以是义故，菩萨摩訶萨所有身心不相随逐。

“善男子，一切凡夫身心相随，菩萨不尔，为化众生故，虽现身小，心亦不小。何以故？诸菩萨等所有心性常广大故。虽现大身，心亦不大。云何大身？身如三千大千世界。云何小心？行婴

⁸ 大正藏：菩萨若言：‘因我说法令诸众生不闻者闻。’

儿行。以是义故，心不随身。

“菩萨⁹已于无量阿僧祇劫，远酒不饮而心亦动，心无悲苦身亦流泪，实无恐怖身亦战栗。以是义故，当知菩萨身、心自在，不相随逐。菩萨摩訶萨惟¹⁰现一身，而诸众生各各见异。

“善男子¹¹，云何菩萨摩訶萨修大涅槃，昔所不闻而今得闻？菩萨摩訶萨先取声相，所谓象声、马声、车声、人声、贝、鼓、箫、笛、歌、哭等声，而修习之；以修习故，能闻无量三千大千世界所有地狱音声；复转修习得异耳根，异于声闻、缘觉天耳。何以故？二乘所得清净耳通¹²，若依初禅净妙四大，唯闻初禅，不闻二禅，乃至四禅亦复如是。虽能¹³一时闻于¹⁴三千大千世界所有音声，而不能闻无量无边恒河沙等世界音声。以是义故，菩萨所得异于声闻、缘觉耳根。以是异故，昔所不闻而今得闻。虽闻音声而心初无闻声之相，不作有相、常相、乐相、我相、净相、主相、依相、作相、因相、定相、果相。以是义故，诸菩萨等昔所不闻而今得闻。”

⁹ 大正藏：菩萨摩訶萨；永乐北藏及龙藏：菩萨

¹⁰ 大正藏：唯

¹¹ 大正藏：复次，善男子；永乐北藏及龙藏：善男子

¹² 大正藏：根

¹³ 大正藏：可

¹⁴ 大正藏：得闻；永乐北藏及龙藏：闻于

尔时，光明遍照高贵德王菩萨¹⁵言：“如¹⁶佛所说：‘不作定相，不作果相。’是义不然。何以故？如来上¹⁷说：‘若人闻是大涅槃经一句、一字，必定得成阿耨多罗三藐三菩提。’如来于今¹⁸复言无定无果。若得阿耨多罗三藐三菩提，即是定相，即是果相，云何而言无定无果？闻恶声故，则生恶心；生恶心故，则至三涂；若至三涂，则是定果，云何而言无定无果？”

尔时，如来赞言：“善哉！善哉！善男子，能作是问。若使诸佛说诸音声有定、果相者，则非诸佛世尊之相，是魔王相、生死之相、远涅槃相。何以故？一切诸佛凡所演说无定、果相。善男子，譬如刀中照人面像，竖则见长，横则见广，若有定相，云何而得竖则见长、横则见广？以是义故，诸佛世尊凡所演说无定、果相。

“善男子，夫涅槃者，实非声果。若使涅槃是声果者，当知涅槃非是常法。善男子，譬如世间从因生法，有因则有果，无因则无果。因无常故，果亦无常。所以者何？因亦作果，果亦作因。以是义故，一切诸法无有定相。若使涅槃从因生

¹⁵ 大正藏：菩萨摩訶萨；永乐北藏及龙藏：菩萨

¹⁶ 大正藏：若

¹⁷ 大正藏：先

¹⁸ 大正藏：于今云何；永乐北藏及龙藏：于今

者，因无常故，果亦无常。而是涅槃不从因生，体非是果，是故为常。善男子，以是义故，涅槃之体无定无果。

“善男子，夫涅槃者，亦可言定，亦可言果。云何为定？一切诸佛所有涅槃常、乐、我、净，是故为定。无生、老、坏，是故为定。一阐提等犯四重禁、诽谤方等、作五逆罪，舍除本心必定得故，是故为定。

“善男子，如汝所言，若人闻我说大涅槃一字、一句得阿耨多罗三藐三菩提者，汝于是义犹未解了。汝今¹⁹谛听，吾当为汝更分别说²⁰。善男子，若有善男子、善女人闻大涅槃一字、一句，不作字相，不作句相，不作闻相，不作佛相，不作说相，如是义者名无相相，以无相相故得阿耨多罗三藐三菩提。

“善男子，如汝所言，闻恶声故至三涂者，是义不然。何以故？非以恶声而至三涂，当知是果乃是恶心。所以者何？有善男子、善女人等虽闻恶声，心不生恶，是故当知非因恶声生三趣中。而诸众生因烦恼结，恶心滋多生三恶趣，非因恶

¹⁹ 大正藏：当

²⁰ 大正藏：之

声。若声有定相，诸有闻者，一切悉应生于恶心。或有生者、有不生者，是故当知声无定相。以无定相²¹故，虽复因之，不生恶心。”

“世尊！声若无定，云何菩萨昔所不闻而今得闻？”

“善男子，声无定相，昔所不闻，令诸菩萨而今得闻。以是义故，我作是说：‘昔所不闻而今得闻。’

“善男子，云何昔所不见而今得见？菩萨摩訶萨²²修大涅槃微妙经典，先取明相，所谓日、月、星宿、庭²³燎、灯烛、珠火之明、药草等光，以修习故，得异眼根，异于声闻、缘觉所得。云何为异？二乘所得清净天眼，若依欲界四大眼根不见初禅；若依初禅，不见上地，乃至白眼犹不能见；若欲多见，极至三千大千世界。菩萨摩訶萨不修天眼，见妙色身悉是骨相，虽见他方恒河沙等世界色相，不作色相，不作常相、有相、物相、名字等相，作因缘相，不作见相，不言是眼微妙净相，唯见因缘、非因缘相。云何因缘？色是眼缘。若使是色非因缘者，一切凡夫不应生于

²¹ 大正藏：定；永乐北藏及龙藏：定相

²² 大正藏：善男子，菩萨摩訶萨；永乐北藏及龙藏：菩萨摩訶萨

²³ 大正藏：庭

见色之相。以是义故，色名因缘。非因缘者，菩萨摩訶萨虽复见色，不生²⁴色相，是故非缘。以是义故，菩萨所得清净天眼异于声闻、缘觉所得。以是异故，一时遍见十方世界现在诸佛，是名菩萨眼²⁵所不见而今得见。以是异故，能见微尘声闻、缘觉所不能见。以是异故，虽见自眼，初无见相，见无常相，见凡夫身三十六物不净充满，如于掌中观阿摩勒果。以是义故，昔所不见而今得见。

“若见众生所有色相，则知其人大小乘根。一触衣故，亦知是人善恶诸根差别之相。以是义故，昔所不知而今得知。以一见故，昔所不知而今得知。以此知故，昔所不见而今得见。

“善男子²⁶，云何菩萨昔所不知而今得知？菩萨摩訶萨虽知凡夫贪、恚、痴心，初不作心及心数相，不作众生及以物相，修第一义毕竟空相。何以故？一切菩萨常善修习空性相故。以修空故，昔所不知而今得知。云何为知？知无有我，无有所，知诸众生皆有佛性。以佛性故，一阐提等舍离本心，悉当得成阿耨多罗三藐三菩提。如此

²⁴ 大正藏：作

²⁵ 大正藏：昔

²⁶ 大正藏：复次，善男子；永乐北藏及龙藏：善男子

皆是声闻、缘觉所不能知，菩萨能知。以是义故，昔所不知而今得知。

“复次，善男子，云何昔所不知而今得知？菩萨摩訶萨修大涅槃微妙经典，念过去世一切众生所生种姓、父母、兄弟、妻子、眷属、知识、怨憎，于一念中得殊异智，异于声闻、缘觉智慧。云何为异？声闻、缘觉所有智慧，念过去世所有众生种姓、父母乃至怨憎，而作种姓至怨憎相。菩萨不尔，虽念过去种姓、父母乃至怨憎，终不生于种姓、父母、怨憎等相，常作法相、空寂之相。是名菩萨昔所不知而今得知。

“复次，善男子，云何昔所不知而今得知？菩萨摩訶萨修大涅槃微妙经典得他心智，异于声闻、缘觉所得。云何为异？声闻、缘觉以一念智知人心时，则不能知地狱、畜生、饿鬼、天心。菩萨不尔，于一念中遍知六趣众生之心。是名菩萨昔所不知而今得知。

“复次，善男子，复有异知，菩萨摩訶萨于一心中知须陀洹初心，次第至十六心，以是义故，昔所不知而今得知。是为菩萨修大涅槃具足成就第二功德。

“复次，善男子，云何菩萨摩訶萨修大涅槃

成就具足第三功德？善男子，菩萨摩訶萨修大涅槃舍慈得慈，得慈之时不从因缘。云何名为舍慈得慈？善男子，慈，名世谛。菩萨摩訶萨舍世谛故²⁷得第一义慈，不从缘得²⁸。

“复次，云何舍慈得慈？慈若可舍，名凡夫慈；慈若可得，即名菩萨无缘之慈。舍一阐提慈、犯重禁慈、谤方等慈、作五逆慈，得怜悯慈，得如来慈、世尊之慈、无因缘慈。

“云何复名舍慈得慈？舍黄门慈、无根、二根、女人之慈、屠脍、猎师、畜养鸡猪如是等慈，亦舍声闻、辟支佛慈，得诸菩萨无缘之慈。不见己慈，不见他慈；不见持戒，不见破戒。虽自见悲，不见众生；虽有苦受，不见受者。何以故？以修第一真实义故。是名菩萨修大涅槃成就具足第三功德。

“复次，善男子，云何菩萨摩訶萨修大涅槃成就具足第四功德？善男子，菩萨摩訶萨修大涅槃成就具足第四功德，有十事²⁹。何等为十？一者，根深难可倾拔；二者，自身生决定想；三者，不观福田及非福田；四者，修净佛土；五者，灭

²⁷ 大正藏：慈

²⁸ 大正藏：第一义慈不从缘得；永乐北藏及龙藏：不从缘得

²⁹ 大正藏：十种事；永乐北藏及龙藏：十事

除有余；六者，断除业缘；七者，修清净身；八者，了知诸缘；九者，离诸怨敌；十者，断除二边。

“云何根深难可倾拔？所言根者，名不放逸。不放逸者，为是何根？所谓阿耨多罗三藐三菩提根。善男子，一切诸佛诸善根本皆不放逸，不放逸故，诸余善根展转增长；以能增长诸善根故，于诸善中最为殊胜。善男子，如诸迹中，象迹为上；不放逸法亦复如是，于诸善法最为殊胜。善男子，如诸明中，日光为最；不放逸法亦复如是，于诸善法最为殊胜。善男子，如诸王中，转轮圣王为最第一；不放逸法亦复如是，于诸善法为最第一。善男子，如诸流中，四河为最；不放逸法亦复如是，于诸善法为上为最。善男子，如诸山中，须弥山王为最第一；不放逸法亦复如是，于诸善法为最第一。善男子，如水生华中，青莲为最；不放逸法亦复如是，于诸善法为最为上。善男子，如陆生华中，婆利师华为最为上；不放逸法亦复如是，于诸善法为最为上。善男子，如诸兽中，师子为最；不放逸法亦复如是，于诸善法为最为上。善男子，如飞鸟中，金翅鸟王为最为上；不放逸法亦复如是，于诸善法为最为上。善

男子，如大身中，罗睺阿修罗王为最为上；不放逸法亦复如是，于诸善法为最为上。善男子，如一切众生，若二足、四足、多足、无足中，如来为最；不放逸法亦复如是，于善法中为最为上。善男子，如诸众中，佛僧为上；不放逸法亦复如是，于善法中为最为上。善男子，如佛法中，大涅槃法为最为上；不放逸法亦复如是，于诸善法为最为上。善男子，以是义故，不放逸根深固难拔。云何不放逸故而得增长？所谓信根、戒根、施根、慧根、忍根、闻根、进根、念根、定根、善知识根，如是诸根，不放逸故而得增长。以增长故，深固难拔。以是义故，名为菩萨摩訶萨修大涅槃根深难拔。

“云何于身作决定想？于自身所生决定心：‘我今此身，于未来世定当为阿耨多罗三藐三菩提器。心亦如是，不作狭小，不作变易，不作声闻、辟支佛心，不作魔心及自乐心、乐生死心，常为众生求慈悲心。’是名菩萨于自身中生决定心：‘我于来世当为阿耨多罗三藐三菩提器。’以是义故，菩萨摩訶萨修大涅槃于自身中生决定想。

“云何菩萨不观福田及非福田？云何福田？外道持戒上至诸佛，是名福田。若有念言：‘如

是等辈是真福田。’当知是心则为狭劣。菩萨摩訶萨悉观一切无量众生无非福田。何以故？以善修习异念处故。有异念处善修习者，观诸众生无有持戒及以毁戒，常观诸佛世尊所说：‘施虽四种，俱得净报。’何等为四？一者，施主清净，受者不净；二者，施主不净，受者清净；三者，施、受俱净；四者，二俱不净。云何施净、受者不净？施主具有戒、闻、智慧，知有惠施及以果报；受者破戒，专著邪见，无施无报。是名施净受者不净。云何名为受者清净，施主不净？施主破戒，专著邪见，言无惠施及以果报；受者持戒、多闻、智慧，知有惠施及施果报。是名施主不净，受者清净。云何名为施受俱净？施者、受者俱有持戒、多闻、智慧，知有惠施及施果报，是名施受二俱清净。云何名为二俱不净？施者、受者破戒、邪见，言无有施及施果报。若如是者，云何复言得净果报？以无施无报故，名为净。

“善男子，若有不见施及施报，当知是人无名破戒、专著邪见。若依声闻，言不见施及施果报，是则名为破戒、邪见。若依如是大涅槃经，不见惠施及施果报，是则名为持戒、正见。菩萨摩訶萨有异念处，以修习故，不见众生持戒、破

戒、施者、受者及施果报，是故得名持戒、正见。以是义故，菩萨摩訶萨不观福田及非福田。

“云何名为净佛国土？菩萨摩訶萨修大涅槃微妙经典，为阿耨多罗三藐三菩提度众生故，离杀害心。以此善根愿与一切众生共之，愿诸众生得寿命长，有大势力，获大神通。以是誓愿因缘力故，于未来世成佛之时，国土所有一切众生得寿命长，有大势力，获大神通。复次，善男子，菩萨摩訶萨修大涅槃微妙经典，为阿耨多罗三藐三菩提度众生故，离偷盗心。以此善根愿与一切众生共之，愿诸佛国土地所有纯是七宝，众生富足，所欲自恣。以此誓愿因缘力故，于未来世成佛之时所得国土纯是七宝，众生富足，所欲自恣。复次，善男子，菩萨摩訶萨修大涅槃微妙经典，为阿耨多罗三藐三菩提度众生故，离淫³⁰欲心。以此善根愿与一切众生共之，愿诸佛土所有众生无有贪欲、瞋恚、痴心，亦无饥渴苦恼之患。以是誓愿因缘力故，于未来世成佛之时，国土众生远离贪淫、瞋恚、痴心，一切无有饥渴苦恼。复次，善男子，菩萨摩訶萨修大涅槃微妙经典，为阿耨多罗三藐三菩提度众生故，离妄语心。以此

³⁰ 大正藏：淫

善根愿与一切众生共之，愿诸佛土常有华果、茂林³¹、香树，所有众生得妙音声。以是誓愿因缘力故，于未来世成佛之时，所有国土常有华果、茂林³²、香树，其中众生悉得清净上妙音声。复次，善男子，菩萨摩訶萨修大涅槃微妙经典，为阿耨多罗三藐三菩提度众生故，远离两舌。以此善根愿与一切众生共之，愿诸佛土所有众生常共和合，讲说正法。以是誓愿因缘力故，成佛之时，国土所有一切众生悉共和合，讲论法要。复次，善男子，菩萨摩訶萨修大涅槃微妙经典，为阿耨多罗三藐三菩提度众生故，远离恶口。以此善根愿与一切众生共之，愿诸佛土地平如掌，无有沙石³³、荆棘³⁴、恶刺，所有众生其心平等。以是誓愿因缘力故，于未来世成佛之时，所有³⁵国土地平如掌，无有石沙、荆棘、恶刺，所有众生其心平等。复次，善男子，菩萨摩訶萨修大涅槃微妙经典，为阿耨多罗三藐三菩提度众生故，离无义语。以此善根愿与一切众生共之，愿诸佛土所有众生无有苦恼。以是誓愿因缘力故，于未来世成

³¹ 大正藏：茂林、华果；永乐北藏及龙藏：华果、茂林

³² 大正藏：茂林、华果；永乐北藏及龙藏：华果、茂林

³³ 大正藏：石沙；永乐北藏及龙藏：沙石

³⁴ 大正藏：棘

³⁵ 大正藏：得

佛之时，国土所有一切众生无有苦恼。复次，善男子，菩萨摩訶萨修大涅槃微妙经典，为阿耨多罗三藐三菩提度众生故，远离贪嫉。以此善根愿与一切众生共之，愿诸佛土一切众生无有贪嫉、恼害、邪见。以是³⁶誓愿因缘力故，于未来世成佛之时，国土所有一切众生悉无贪嫉、恼害、邪见。复次，善男子，菩萨摩訶萨修大涅槃微妙经典，为阿耨多罗三藐三菩提度众生故，远离恼害。以此善根愿与一切众生共之，愿诸佛土所有众生悉共修习大慈大悲，得一子地。以是誓愿因缘力故，于未来世成佛之时，世界所有一切众生悉共修习大慈大悲，得一子地。复次，善男子，菩萨摩訶萨修大涅槃微妙经典，为阿耨多罗三藐三菩提度众生故，远离邪见。以此善根愿与一切众生共之，愿诸国³⁷土所有众生悉得摩訶般若波罗蜜。以是誓愿因缘力故，于未来世成佛之时，世界众生悉得受持摩訶般若波罗蜜。是名菩萨修净佛土。

“云何菩萨摩訶萨灭除有余？有余有三：一者，烦恼余报；二者，余业；三者，余有。善男子，云何名为烦恼余报？若有众生习近贪欲，是

³⁶ 大正藏：此

³⁷ 大正藏：佛

报熟故，墮于地狱；从地狱出，受畜生身，所谓鸽、雀、鸳鸯、鸚鵡、耆婆耆婆、舍利伽鸟、青雀、鱼、鳖、猕猴、麀鹿；若得人身，受黄门形、女人、二根、无根、淫女；若得出家，犯初重戒。是名余报。复次，善男子，若有众生以殷重心习近瞋恚，是报熟故，墮于地狱。从地狱出，受畜生身，所谓毒蛇，具四种毒：见毒、触毒、啮毒、嘘毒，狮子、虎、狼、熊罴、猫、狸、鹰、鹞之属；若得人身，具足十六诸恶律仪；若得出家，犯第二重戒。是名余报。复次，善男子，若有修习愚痴之人，是报熟时，墮于地狱。从地狱出，受畜生身，所谓象、猪、牛、羊、水牛、蚤、虱、蚊、虻、蚊子等形；若得人身，聋、盲、瘖哑、癱残、背伛³⁸，诸根不具，不能受法；若得出家，诸根暗钝，喜犯重戒，乃至五钱³⁹。是名余报。复次，善男子，若有修习憍慢之人，是报熟时，墮于地狱。从地狱出，受畜生身，所谓粪虫、驼、驴、犬、马；若生人中，受奴婢身，贫穷乞匄；或得出家，常为众生之所轻贱，破第四戒。是名余报。如是等名烦恼余报。如是余报，菩萨摩訶

³⁸ 大正藏：倮

³⁹ 大正藏：卑贱：永乐北藏及龙藏：五钱

萨以能修习大涅槃故，悉得除灭。

“云何余业？谓一切凡夫业、一切声闻业、须陀洹人受七有业、斯陀含人受二有业、阿那含人受色有业，是名余业。如是余业，菩萨摩訶萨以能修习大涅槃故，悉得除断⁴⁰。

“云何余有？阿罗汉得阿罗汉果、辟支佛得辟支佛果，无业无结而转二果，是名余有。

“如是三种有余之法，菩萨摩訶萨修习大乘大涅槃经故得除灭⁴¹，是名菩萨摩訶萨灭除有余。

“云何菩萨修清净身？菩萨摩訶萨修不杀戒有五种心，谓下、中、上、上上、上中上⁴²，乃至正见亦复如是。是五十心名初发心，具足决定成五十心，是名满足。如是百心名百福德，具足百福成于一相，如是展转具足成就三十二相，名清净身。所以复修八十种好，世有众生事八十种神⁴³。何等八十？十二日、十二大天、五大星、北斗、马天、行道天、婆罗堕跋阇天、功德天、二十八宿、地天、风天、水天、火天、梵天、楼陀天、因提天、拘摩罗天、八臂天、摩醯首罗天、半阁罗天、鬼子母天、四天王天、造书天、婆薮

⁴⁰ 大正藏：断除；永乐北藏及龙藏：除断

⁴¹ 大正藏：灭除；永乐北藏及龙藏：除灭

⁴² 大正藏：上中、上上；永乐北藏及龙藏：上上、上中上

⁴³ 大正藏：八十神；永乐北藏及龙藏：八十种神

天，是名八十。为此众生修八十好以自庄严，是名菩萨清净之身。何以故？是八十天，一切众生之所信伏，是故菩萨修八十好其身不动，令彼众生随其所信各各得见，见已宗敬，各发阿耨多罗三藐三菩提心。以是义故，菩萨摩訶萨修于净身。善男子，譬如有人欲请大王，要当庄严所有舍宅，极令清净，办具种种百味肴饍，然后王乃就其所请。菩萨摩訶萨亦复如是，欲请阿耨多罗三藐三菩提法轮王故，先当修身，极令清净，无上法王乃当处之。以是义故，菩萨摩訶萨要当修于清净之身。善男子，譬如有人欲服甘露，先当净身；菩萨摩訶萨亦复如是，欲服无上甘露法味般若波罗蜜，要当先以八十种好清净其身。善男子，譬如妙好金银宝器，盛于⁴⁴净水，中表俱净；菩萨摩訶萨其身清净亦复如是，盛阿耨多罗三藐三菩提水，中表俱净。善男子，如波罗捺素白之衣易受染色。何以故？性白净故。菩萨摩訶萨亦复如是，以身净故，疾得阿耨多罗三藐三菩提。以是义故，菩萨摩訶萨修于净身。

“云何菩萨⁴⁵了知诸缘？菩萨摩訶萨不见色

⁴⁴ 大正藏：之

⁴⁵ 大正藏：菩萨摩訶萨；永乐北藏及龙藏：菩萨

相，不見色緣，不見色體，不見色生，不見色滅，不見一相，不見異相，不見見者，不見相貌，不見受者。何以故？了因緣故。如色，一切法亦如是，是名菩薩了知諸緣。

“云何菩薩離⁴⁶諸怨敵？一切煩惱是菩薩怨，菩薩摩訶薩常遠離故，是名菩薩壞諸怨敵。五住菩薩視諸煩惱不名為怨。所以者何？因煩惱故，菩薩有生；以有生故，故能展轉教化眾生。以是義故，不名為怨。何等為怨？所謂誹謗方等經者。菩薩隨生，不畏地獄、畜生、餓鬼，唯畏如是謗方等者。一切菩薩有八種魔名為怨家，遠是八魔名離怨家。是名菩薩離諸怨敵。

“云何菩薩遠離二邊？言二邊者，謂二十五有及愛煩惱。菩薩常離二十五有及愛煩惱，是名菩薩遠離二邊。

“是名菩薩摩訶薩修大涅槃具足成就第四功德。”

爾時，光明遍照高貴德王菩薩摩訶薩言：“如佛所說：‘若有菩薩修大涅槃，悉作如是十事功德。’如來何故唯修九事，不修淨土？”

佛言：“善男子，我于往昔亦常具修如是十

⁴⁶ 大正藏：坏

事，一切菩萨及诸如来无有不修是十事者。若使世界不净充满，诸佛世尊于中出者，无有是处。善男子，汝今莫谓诸佛出兴不净世界，当知是心不善狭劣。汝今当知，我实不出阎浮提界。譬如有人说言：‘此界独有日月，他方世界无有日月。’如是之言无有义理。若有菩萨发如是言：‘此佛世界秽恶不净，他方佛土清净庄严。’亦复如是。

“善男子，西方去此娑婆世界度三十二恒河沙等诸佛国土，彼有世界名曰无胜。彼土何故名曰无胜？其土所有庄严之事悉皆⁴⁷平等，无有差别，犹如西方安乐世界，亦如东方满月世界。我于彼土出现于世。为化众生故，于此界阎浮提中现转法轮。非但我身独于此中现转法轮，一切诸佛亦于此中而转法轮。以是义故，诸佛世尊非不修行如是十事。

“善男子，慈氏菩萨以誓愿故，当来之世令此世界清净庄严。以是义故，一切诸佛所有世界无不严净。

“复次，善男子，云何菩萨⁴⁸修大涅槃微妙经典具足成就第五功德？善男子，菩萨摩訶萨修

⁴⁷ 大正藏：皆悉；永乐北藏及龙藏：悉皆

⁴⁸ 大正藏：菩萨摩訶萨；永乐北藏及龙藏：菩萨

大涅槃具足成就第五功德，有五事⁴⁹。何等为五？一者，诸根完具；二者，不生边地；三者，诸天爱念；四者，常为天、魔、沙门、刹利、婆罗门等之所恭敬；五者，得宿命智。菩萨以是大涅槃经因缘力故，具足如是五事功德。”

光明遍照高贵德王菩萨言：“如佛所说：‘若有善男子、善女人修于布施则得具成五事功德。’今云何言因大涅槃得是五事？”

佛言：“善哉！善哉！善男子，如是之事其义各异，今当为汝分别解说。

“施得五事：不定、不常、不净、不胜、不异，非无漏，不能利益、安乐、怜悯一切众生。若依如是大涅槃经所得五事，是定、是常、是净、是胜、是异，是无漏，则能利益、安乐、怜悯一切众生。善男子，夫布施者，得离饥渴；大涅槃经能令众生悉得远离二十五有渴爱之病。布施因缘令生死相续；大涅槃经能令生死断不相续。因布施故，受凡夫法；因大涅槃得作菩萨。布施因缘能断一切贫穷苦恼；大涅槃经能断一切贫善法者。布施因缘有分有果；因大涅槃得阿耨多罗三

⁴⁹ 大正藏：五事果；永乐北藏及龙藏：五事

藐三菩提无分无果。是名菩萨⁵⁰修大涅槃微妙经典具足成就第五功德。

“复次，善男子⁵¹，云何菩萨修大涅槃微妙经典具足成就第六功德？菩萨摩訶萨修大涅槃得金刚三昧，安住是中，悉能破散一切诸法，见一切法皆是无常，皆是动相，恐怖因缘，病苦劫盗，念念灭坏，无有真实，一切皆是魔之境界，无可见相。菩萨摩訶萨住是三昧，虽施众生，乃至不见一众生；实为众生故，精勤修习尸波罗蜜，乃至修习般若波罗蜜亦复如是。菩萨若见有一众生，不能毕竟具足成就檀波罗蜜乃至具足般若波罗蜜。

“善男子，譬如金刚，所拟之处无不碎坏，而是金刚无有折损。金刚三昧亦复如是，所拟之法无不碎坏，而是三昧无有折损。善男子，如诸宝中，金刚最胜。菩萨所得金刚三昧亦复如是，于诸三昧为最第一。何以故？菩萨摩訶萨修是三昧，一切三昧悉来归属。善男子，如诸小王悉来归属转轮圣王。一切三昧亦复如是，悉来归属金刚三昧。善男子，譬如有人为国怨讎，人所厌患，

⁵⁰ 大正藏：菩萨摩訶萨；永乐北藏及龙藏：菩萨

⁵¹ 大正藏：善男子；永乐北藏及龙藏：复次，善男子

有人杀之，一切世人无不称赞是人功德。金刚三昧亦复如是，菩萨修习能坏一切众生怨敌，是故常为一切三昧之所宗敬。善男子，譬如有人，其力盛壮，人无当者，复更有人力能伏之，当知是人世所称美。金刚三昧亦复如是，力能摧伏难伏之法，以是义故，一切三昧悉来归属。善男子，譬如有人在大海浴，当知是人已用诸河泉池之水。菩萨摩訶萨亦复如是，修习如是金刚三昧，当知已为修习诸余一切三昧。善男子，如香山中有一泉水名阿耨达，其泉具足八味之水，有人饮之无诸病苦。金刚三昧亦复如是，具八正道，菩萨修习，断诸烦恼疮疣重病。善男子，如人供养摩醯首罗，当知是人已为供养一切诸天。金刚三昧亦复如是，有人修习，当知已为修习一切诸余三昧。

“善男子，若有菩萨安住如是金刚三昧，见一切法无有障阂⁵²，如于掌中观阿摩勒果。菩萨虽复得如是见，终不作想：‘见一切法。’

“善男子，譬如有人坐四衢道，见诸众生来、去、坐、卧。金刚三昧亦复如是，见一切法生、灭、出、没。善男子，譬如高山，有人登之，远望诸方皆悉明了。金刚定山亦复如是，菩萨登之，

⁵² 大正藏：碍

远望诸法无不明瞭。善男子，譬如春月，天降甘雨，其滂微致，间无空处，净⁵³眼之人见之明了。菩萨亦尔，得金刚定清静之日，远见东方所有世界，其中或有国土成坏，一切皆见，明了无障，乃至十方亦复如是。善男子，如由乾陀山七日并出，其山所有树木丛林一切烧尽。菩萨修习金刚三昧亦复如是，所有一切烦恼丛林即时消灭。善男子，譬如金刚，虽能摧破一切有物，终不生念：‘我能摧破。’金刚三昧亦复如是，菩萨修已，能破烦恼，终不生念：‘我能坏结。’善男子，譬如大地能持万物，终不生念：‘我力能持。’火亦不念：‘我能烧物。’水亦不念：‘我能润渍。’风亦不念：‘我能动物。’空亦不念：‘我能容受。’涅槃亦复不生念言：‘我令众生而得灭度。’金刚三昧亦复如是，虽能灭除一切烦恼，而初无心言：‘我能灭。’

“若有菩萨安住如是金刚三昧，于一念中变身如佛，其数无量，遍满十方恒河沙等诸佛世界。如⁵⁴是菩萨虽作是化，其心初无憍慢之想。何以故？菩萨常念：‘谁有是定，能作是化？唯有菩

⁵³ 大正藏：明

⁵⁴ 大正藏：而

萨安住如是金刚三昧乃能作耳。’ 菩萨摩訶萨安住如是金刚三昧，于一念中遍至十方恒河沙等诸佛世界，还其本处，虽有是力，亦不念言：‘我能如是。’ 何以故？以是三昧因缘力故。菩萨摩訶萨安住如是金刚三昧，于一念中能断十方恒河沙等世界众生所有烦恼，而心初无断诸众生烦恼之想。何以故？以是三昧因缘力故。菩萨住是金刚三昧，以一音声有所演说，一切众生各随种类而得解了；示现一色，一切众生各各皆见种种色相；安住一处，身不移易，能令众生随其方面各各而见；演说一法，若界若入，一切众生各随本解而得闻之。菩萨安住如是三昧，虽见众生而心初无众生之相，虽见男女无男女相，虽见色法无有色相乃至见识亦无识相，虽见昼夜无昼夜相，虽见一切无一切相，虽见一切烦恼诸结亦无一切烦恼之相，见入⁵⁵ 圣道无圣道相，虽见菩提无菩提相，见于涅槃无涅槃相。何以故？善男子，一切诸法本无相故。菩萨以是三昧力故，见一切法如本无相。

“何故名为金刚三昧？善男子，譬如金刚，若在日中，色则不定。金刚三昧亦复如是，在于

⁵⁵ 大正藏：八；永乐北藏及龙藏：入

大众色亦不定，是故名为金刚三昧。善男子，譬如金刚，一切世人不能平⁵⁶价。金刚三昧亦复如是，所有功德一切人天不能平⁵⁷量，是故复名金刚三昧。善男子，譬如贫人，得金刚宝即⁵⁸得远离贫穷、困苦、恶鬼、邪毒。菩萨摩訶萨亦复如是，得是三昧则能远离烦恼、诸苦、诸魔、邪毒，是故复名金刚三昧。是名菩萨修大涅槃具足成就第六功德。

大般涅槃经卷第二十二

⁵⁶ 大正藏：评

⁵⁷ 大正藏：评

⁵⁸ 大正藏：则

大般涅槃经卷第二十三

北凉天竺三藏昙无讖译 梵

宋沙门慧严慧观同谢灵运再治

高贵德王菩萨品第二十二之五⁵⁹

“复次，善男子，云何菩萨摩訶萨修大涅槃微妙经典具足成就第七功德？”

“善男子，菩萨摩訶萨修大涅槃微妙经典作是思惟：‘何法能为大般涅槃而作近因？’菩萨即知有四种法为大涅槃而作近因。若言勤修一切苦行是大般⁶⁰涅槃近因缘者，是义不然。所以者何？若离四法得涅槃者，无有是处。

“何等为四？一者，亲近善友；二者，专心听法；三者，系念思惟；四者，如法修行。

“善男子，譬如有人，身遇众病，若热若冷，虚劳下疔，众邪鬼毒，至⁶¹良医所，良医即为随病说药。是人至心善受医教，随教合药，如法服之，服已病愈，身得安乐。有病之人，譬诸菩萨；大良医者，譬善知识；良医所说，譬方等经；善

⁵⁹ 大正藏：光明遍照高贵德王菩萨品之五

⁶⁰ 大正藏：大；永乐北藏及龙藏：大般

⁶¹ 大正藏：到

受医教，譬善思惟方等经义；随教合药，譬如法修行三十七助道之法；病除愈者，譬灭烦恼；得安乐者，譬⁶²得涅槃常、乐、我、净。

“善男子，譬如有王，欲如法治，令民安乐，咨诸智臣，其法云何？诸臣即以先王旧法而为说之，王既闻已，至心信行，如法治国，无诸怨敌，是故令民安乐无患。善男子，王者，譬诸菩萨；诸智臣者，譬善知识；智臣为王所说治法，譬十二部经；王既闻已，至心信行，譬诸菩萨系心思惟十二部经所有深义；如法治国，譬诸菩萨如法修行，所谓六波罗蜜；以能修习六波罗蜜故，无诸怨敌，譬诸菩萨已离诸结烦恼恶贼；得安乐者，譬诸菩萨得大涅槃常、乐、我、净。

“善男子，譬如有人，遇恶癞病，有善知识而语之言：‘汝若能至⁶³须弥山边，病可得差。所以者何？彼有良药，味如甘露，若能服者，病无不差⁶⁴。’其人至心信是事已，即往彼山采⁶⁵服甘露，其病除愈，身得安乐。恶癞病者，譬诸凡夫；善知识者，譬诸菩萨摩訶萨等；至心信受，譬四无量心；须弥山者，譬八圣道；甘露味者，譬于

⁶² 大正藏：喻

⁶³ 大正藏：到

⁶⁴ 大正藏：愈

⁶⁵ 大正藏：采

佛性；癩病除愈，譬灭烦恼；得安乐者，譬得涅槃常、乐、我、净。

“善男子，譬如有人，畜诸弟子，聪明大智，是人昼夜常教不倦。诸菩萨等亦复如是，一切众生，有信不信，而常教化，无有疲厌。

“善男子，善知识者，所谓佛、菩萨，辟支佛、声闻人中信方等者。何故名为善知识耶？善知识者，能教众生远离十恶，修行十善。以是义故，名善知识。

“复次，善知识者，如法而说，如说而行。云何名为如法而说，如说而行？自不杀生，教人不杀，乃至自行正见，教人正见。若能如是，则得名为真善知识。自修菩提，亦能教人修行菩提。以是义故，名善知识。自能修行信、戒、布施、多闻、智慧，亦能教人信、戒、布施、多闻、智慧。复以是义，名善知识。

“善知识者，有善法故。何等善法？所作之事不求自乐，常为众生而求安乐；见他有过不讼⁶⁶其短，口常宣说淳⁶⁷善之事。以是义故，名善知识。

⁶⁶ 大正藏：说

⁶⁷ 大正藏：纯

“善男子，如空中月，从初一日至十五日渐渐增长。善知识者亦复如是，令诸学人渐远恶法，增长善法。

“善男子，若有亲近善知识者，本未有戒、定、慧、解脱、解脱知见，即便有之；未具足者，则得增广。何以故？以其亲近善知识故。因是亲近，复得了达十二部经甚深之义。若能听是十二部经甚深义者，名为听法；听法者则是大乘方等经典；听方等经名真听法；真听法者即是听受大涅槃经。大涅槃中闻有佛性，如来毕竟不般涅槃，是故名为专心听法；专心听法名八圣道，以八圣道能断贪欲、瞋恚、愚痴，故名听法。夫听法者名十一空，以此诸空于一切法不作相貌。夫听法者，名初发心乃至究竟阿耨多罗三藐三菩提心，以因初心得大涅槃，不以闻故得大涅槃，以修习故得大涅槃。

“善男子，譬如病人，虽闻医教及药名字不能愈病，要以服故乃得除差。虽听十二深因缘法不能断灭一切烦恼，要以系念善思惟故能得除断，是名第三系念思惟。

“复以何义名系念思惟？所谓三三昧：空三昧、无相三昧、无作三昧。空者，于二十五有不

见一实；无作者，于二十五有不作愿求；无相者，无有十相，所谓色相、声相、香相、味相、触相、生相、住相、灭相、男相、女相。修习如是三三昧者，是名菩萨系念思惟。

“云何名为如法修行？如法修行即是修行檀波罗蜜乃至般若波罗蜜，知阴、入、界真实之相，亦知声闻、缘觉、诸佛同于一道而般涅槃。法者，即是常、乐、我、净，不生不老，不病不死，不饥不渴，不苦不恼，不退不没。善男子，解大涅槃甚深义者，则知诸佛终不毕竟入于涅槃。

“善男子，第一真实善知识者，所谓菩萨、诸佛世尊。何以故？常以三种善调御故。何等为三？一者，毕竟软语；二者，毕竟呵责；三者，软语呵责。以是义故，菩萨、诸佛即是真实善知识也。

“复次，善男子，佛及菩萨为大医故名善知识，何以故？知病知药，应病授药故。譬如良医，善八种术，先观病相，相有三种，何等为三？谓风、热、水。风病之人⁶⁸，授之酥油；热病之人授之石蜜；水病之人授之姜汤。以知病根，授药得差，故名良医。佛及菩萨亦复如是，知诸凡夫

⁶⁸ 大正藏：有风病者；永乐北藏及龙藏：风病之人

病有三种：一者，贪欲；二者，瞋恚；三者，愚痴。贪欲病者，教观骨相；瞋恚病者，观慈悲相；愚痴病者，观十二因缘⁶⁹相。以是义故，诸佛、菩萨名善知识。

“善男子，譬如船师，善度⁷⁰人故，名大船师。诸佛、菩萨亦复如是，度诸众生生死大海，以是义故，名善知识。

“复次，善男子，因佛、菩萨令诸众生具足修得善法根本⁷¹故。善男子，譬如雪山乃是种种微妙上药根本之处。佛及菩萨亦复如是，悉是一切善根本处。以是义故，名善知识。善男子，雪山之中有上香药，名曰娑诃⁷²，有人见之，得寿无量，无有病苦，虽有四毒不能中伤。若有触者，增长寿命满百二十。若有念者，得宿命智。何以故？药势力故。诸佛、菩萨亦复如是，若有见者，即得断除一切烦恼，虽有四魔不能干乱。若有触者，命不可夭，不生不死，不退不没。所谓触者，若在佛边听受妙法。若有念者，得阿耨多罗三藐三菩提。以是义故，诸佛、菩萨名善知识。

“善男子，如香山中有阿耨达池，由是池故

⁶⁹ 大正藏：十二缘；永乐北藏及龙藏：十二因缘

⁷⁰ 大正藏：渡

⁷¹ 大正藏：根；永乐北藏及龙藏：根本

⁷² 大正藏：呵

有四大河，所谓恒河、辛头、私陀、博叉。世间众生常作是言：‘若有罪者，浴此四河，众罪得灭。’当知此言虚妄不实。除此已往，何等为实？诸佛、菩萨是乃为实。所以者何？若人亲近，则得灭除一切众罪。以是义故，名善知识。

“复次，善男子，譬如大地，所有药木、一切丛林、百谷、甘蔗、华果之属，值天炎旱，将欲枯死，难陀龙王及婆难陀怜悯众生，从大海出，降注⁷³甘雨，一切丛林、百谷、草木滋润还生。一切众生亦复如是，所有善根将欲消灭，诸佛、菩萨生大慈悲，从智慧海降甘露雨，令诸众生具足还得十善之法。以是义故，诸佛、菩萨名善知识。

“善男子，譬如良医，善八种术，见诸病人，不观种姓、端正、丑陋、钱财、宝货，悉为治之，是故世称为大良医。诸佛、菩萨亦复如是，见诸众生有烦恼病，不观种姓、端正、丑陋、钱财、宝货，生慈悯心，悉为说法。众生闻已，烦恼病除。以是义故，诸佛、菩萨名善知识。以是亲近善友因缘，则得近于大般涅槃。

“云何菩萨听法因缘而得近于大般涅槃？

⁷³ 大正藏：澍

一切众生以听法故则具信根，得信根故，乐行布施、戒、忍、精进、禅定、智慧，得须陀洹果乃至佛果。是故当知，得诸善法皆是听法因缘势力。

“善男子，譬如长者，惟⁷⁴有一子，遣至他国市易所须，示其道路通塞之处，而复戒⁷⁵之：‘若遇淫⁷⁶女，慎莫亲爱。若亲爱者，丧身殒命及以财宝。弊恶之人亦莫交游⁷⁷。’其子敬顺父之教勅，身心安隐，多获宝货。菩萨摩訶萨为诸众生敷演法要亦复如是，示诸众生及四部众诸道通塞。是诸众等以闻法故，远离诸恶，具足诸⁷⁸法。以是义故，听法因缘则得近于大般涅槃。

“善男子，譬如明镜，照人面像无不明了。听法明镜亦复如是，有人照之，则见善恶，明了无翳。以是义故，听法因缘则得近于大般涅槃。

“善男子，譬如商人，欲至宝渚，不知道路，有人示之，其人随语即至宝渚，多获诸珍不可称计。一切众生亦复如是，欲至善处，采求法宝⁷⁹，不知其路通塞之相，菩萨示之，众生随已，得至善处获得无上大涅槃宝。以是义故，听法因缘则

⁷⁴ 大正藏：唯

⁷⁵ 大正藏：诫

⁷⁶ 大正藏：淫

⁷⁷ 大正藏：游

⁷⁸ 大正藏：善

⁷⁹ 大正藏：采取道宝；永乐北藏及龙藏：采求法宝

得近于大般涅槃。

“善男子，譬如醉象，狂逸暴恶，多欲杀害。有调象师，以大铁钩钩搯⁸⁰其顶，即时调顺，恶心都尽。一切众生亦复如是，贪欲、瞋恚、愚痴醉故，欲多造恶。诸菩萨等以闻法钩，搯⁸¹之令住，更不得起造诸恶心。以是义故，听法因缘则得近于大般涅槃。

“是故，我于处处经中说我弟子专心听受十二部经，则离五盖，修七觉分，以是修习七觉分故，则得近于大般涅槃。以听法故，须陀洹人离诸恐怖。所以者何？须达长者身遭重病，心大愁怖，闻舍利弗说须陀洹有四功德、十种慰喻，闻是事已，恐怖即除。以是义故，听法因缘则得近于大般涅槃。何以故？开法眼故。世有三人：一者，无目；二者，一目；三者，二目。无目之人⁸²，常不闻法；一目之人，虽暂闻法，其心不住；二目之人专心听受，如闻而行。以听法故，得知世间如是三人。以是义故，听法因缘则得近于大般涅槃。

“善男子，如我昔在⁸³拘尸那城。时，舍利

⁸⁰ 大正藏：斲

⁸¹ 大正藏：斲

⁸² 大正藏：言无目者；永乐北藏及龙藏：无目之人

⁸³ 大正藏：于

弗身遇病苦，我时顾命阿难⁸⁴广为说法。时，舍利弗闻是事已，告四弟子：‘汝昇⁸⁵我床往至佛所，我欲听法。’时，四弟子奉命昇往，即⁸⁶得闻法，闻法力故，所苦除差，身得安隐。以是义故，听法因缘则得近于大般涅槃。

“云何菩萨思惟因缘而得近于大般涅槃？因是思惟，心得解脱。何以故？一切众生常为五欲之所系缚，以思惟故，悉得解脱。以是义故，思惟因缘则得近于大般涅槃。

“复次，善男子，一切众生常为常、乐、我、净四法之所颠倒。以思惟故，得见诸法无常、无乐、无我、无净。如是见已，四倒即断。以是义故，思惟因缘则得近于大般涅槃。

“复次，善男子，一切诸法有四种相，何等为四？一者，生相；二者，老相；三者，病相；四者，灭相。以是四相，能令一切凡夫众生至须陀洹生大苦恼。若能系念善思惟者，虽遇此四，不生众苦。以是义故，思惟因缘则得近于大般涅槃。

“复次，善男子，一切善法无不因是思惟而

⁸⁴ 大正藏：阿难比丘；永乐北藏及龙藏：阿难

⁸⁵ 大正藏：举

⁸⁶ 大正藏：既

得。何以故？有人虽于无量无边阿僧祇劫专心听法，若不思惟，终不能得阿耨多罗三藐三菩提。以是义故，思惟因缘则得近于大般涅槃。

“复次，善男子，若有众生信佛、法、僧无有变易而生恭敬，当知皆是系念思惟因缘力故，因得断除一切烦恼。以是义故，思惟因缘则得近于大般涅槃。

“云何菩萨如法修行？善男子，断诸恶法，修习善法，是名菩萨如法修行。

“复次，云何如法修行？见一切法空无所有，无常、无乐、无我、无净。以是见故，宁舍身命不犯禁戒，是名菩萨如法修行。

“复次，云何如法修行？修有二种：一者，真实；二者，不实。不实者，不知涅槃、佛性、如来、法、僧、实相、虚空等相，是名不实。云何真实？能知涅槃、佛性、如来、法、僧、实相、虚空等相，是名真实。云何名为知涅槃相？涅槃之相凡有八事。何等为八？一者，尽；二，善性；三，实；四，真；五，常；六，乐；七，我；八，净，是名涅槃。复有八事。何等为八？一者，解脱；二者，善性；三者，不实；四者，不真；五者，无常；六者，无乐；七者，无我；八者，无

净。复有六相：一者，解脱；二者，善性；三者，不实；四者，不真；五者，安乐；六者，清净。若有众生依世俗道断烦恼者，如是涅槃则有八事解脱不实。何以故？不常故⁸⁷。以无常故，则无有实；无有实故，则无有真。虽断烦恼，以还起故，无常、无我、无乐、无净，是名涅槃解脱八事。

“云何六相？声闻、缘觉断烦恼故，名为解脱；而未能得阿耨多罗三藐三菩提故，名不实⁸⁸；以不实故，名为不真；未来之世当得阿耨多罗三藐三菩提故，名无常；以得无漏八圣道故，名为净乐。

“善男子，若如是知，是知涅槃，不名佛性、如来、法、僧、实相、虚空。

“云何菩萨知于佛性？佛性有六。何等为六？一、常，二、净，三、实，四、善，五、当见，六、真。复有七事：一者，可证，余六如上。是名菩萨知于佛性。

“云何菩萨知如来相？如来即是觉相、善相，常、乐、我、净、解脱、真实，示道可见，是名

⁸⁷ 大正藏：以不常故；永乐北藏及龙藏：不常故

⁸⁸ 大正藏：名为不实；永乐北藏及龙藏：名不实

菩萨知如来相。

“云何菩萨知于法相？法者，若善、不善，若常、不常，若乐、不乐，若我、无我，若净、不净，若知、不知，若解、不解，若真、不真，若修、不修，若师、非师，若实、不实，是名菩萨知于法相。

“云何菩萨知于僧相？僧者，常⁸⁹、乐、我、净，是弟子相、可见之相，善、真、不实。何以故？一切声闻得佛道故。何故名真？悟法性故。是名菩萨知于僧相。

“云何菩萨知于实相？实相者，若常、无常，若乐、无乐，若我、无我，若净、无净，若善、不善，若有、若无，若涅槃、非涅槃，若解脱、非解脱，若知、不知，若断、不断，若证、不证，若修、不修，若见、不见，是名实相，非是涅槃、佛性、如来、法、僧、虚空。

“是名菩萨因修如是大涅槃，故知于涅槃、佛性、如来、法、僧实相、虚空等法差别之相。

“善男子，菩萨摩訶萨修大涅槃微妙经典不见虚空。何以故？佛及菩萨虽有五眼所不见故，唯有慧眼乃能见之。慧眼所见无法可见，故名为

⁸⁹ 大正藏：若常；永乐北藏及龙藏：常

见。若是⁹⁰无物名虚空者，如是虚空乃名为实。以是实故，则名常无；以常无故，无乐、我、净。善男子，空名无法，无法名空。譬如世间，无物名空；虚空之性亦复如是，无所有故，名为虚空。

“善男子，众生之性与虚空性俱无实性。何以故？如人说言：‘除灭有物，然后作空。’而是虚空实不可作。何以故？无所有故。以无有故，当知无空。是虚空性若可作者，则名无常；若无常者，不名虚空。

“善男子，如世间人说言：‘虚空无色、无阂⁹¹，常不变易。’是故，世称虚空之性⁹²为第五大。善男子，而是虚空实无有性。以光明故，故名虚空，实无虚空。犹如世谛实无其性，为众生故，说有世谛。

“善男子，涅槃之体亦复如是，无有住处，直是诸佛断烦恼处，故名涅槃。涅槃即是常、乐、我、净。涅槃虽乐，非是受乐，乃是上妙寂灭之乐。诸佛如来有二种乐：一，寂灭乐；二，觉知乐。实相之体有三种乐：一者，受乐；二、寂灭乐；三、觉知乐。佛性一乐，以当见故，得阿耨

⁹⁰ 大正藏：见

⁹¹ 大正藏：碍

⁹² 大正藏：法

多罗三藐三菩提时名菩提乐。”

尔时，高贵德王⁹³菩萨摩訶萨白佛言：“世尊！若烦恼断处是涅槃者，是事不然。何以故？如来往昔初成佛道，至尼连禅河边。尔时，魔王与其眷属到于佛所而作是言：‘世尊！涅槃时至⁹⁴，何故不入？’佛告魔王：‘我今未有多闻弟子，善持禁戒，聪明利智，能化众生，是故不入。’若言烦恼断处是涅槃者，诸菩萨等于无量劫已断烦恼，何故不得称为涅槃？俱是断处，何缘独称诸佛有之，菩萨无耶？若断烦恼非涅槃者，何故如来昔告生名婆罗门言：‘我今此身即是涅槃。’如来又时在毗舍离国，魔复启请如来：‘昔以未有弟子，多闻持戒，聪明利智，能化众生，不入涅槃。今已具足，何故不入？’如来尔时即告魔言：‘汝今莫生悒迟之想，却后三月吾当涅槃。’世尊！若使灭度非涅槃者，何故如来自期三月当般涅槃？世尊！若断烦恼是涅槃者，如来往昔初在道场菩提树下断烦恼时便是涅槃。何故复言：‘却后三月当般涅槃。’世尊！若使尔时涅槃⁹⁵者，云何方为拘尸那城诸力士等说言：‘后夜当般涅槃。’

⁹³ 大正藏：光明遍照高贵德王；永乐北藏及龙藏：高贵德王

⁹⁴ 大正藏：到

⁹⁵ 大正藏：是涅槃；永乐北藏及龙藏：涅槃

如来诚实，云何发是虚妄之言？”

尔时，世尊告光明遍照高贵德王菩萨摩訶萨言：“善男子，若言如来得广长舌，当知如来于无量劫已离妄语，一切诸佛及诸菩萨凡所发言诚谛无虚。善男子，如汝所言，波旬往昔启请于我入涅槃者，善男子，而是魔王真实不知涅槃定相。何以故？波旬意谓不化众生、默然而住便是涅槃。善男子，譬如世人，见人不言，无所造作，便谓是人如死无异。魔王波旬亦复如是，意谓如来不化众生，默无所说，便谓如来入般涅槃。

“善男子，如来不说佛、法、众僧无差别相，唯说常住、清净二法无差别耳。善男子，佛亦不说佛及佛性、涅槃无差别相，惟⁹⁶说常、恒不变无差别耳。善男子，佛亦不说涅槃、实相无差别相，惟⁹⁷说常有、实不变易无差别耳。

“善男子，尔时，我诸声闻弟子生于诤讼，如拘睒弥诸恶比丘违反我教，多犯禁戒，受不净物，贪求利养，向诸白衣而自赞叹：‘我得无漏，谓须陀洹果。’乃至‘我得阿罗汉果。’毁辱他人，于佛、法、僧、戒律、和尚⁹⁸不生恭敬。公于我

⁹⁶ 大正藏：唯

⁹⁷ 大正藏：唯

⁹⁸ 大正藏：上

前言：‘如是物，佛所听畜；如是等物，佛不听畜。’我即⁹⁹语言：‘如是等物，我实不听。’复反我言：‘如是等物，实是佛听。’如是恶人不信我言，为是等故，我告波旬：‘汝莫悞迟，却后三月当般涅槃。’

“善男子，因如是等恶比丘故，令诸声闻受学弟子不见我身，不闻我法，便言如来入于涅槃；唯诸菩萨能见我身、常闻我法，是故不言我入涅槃。声闻弟子虽复发言如来涅槃，而我实不入于涅槃。

“善男子，若我所有声闻弟子说言如来入涅槃者，当知是人非我弟子，是魔伴党、邪见恶人，非正见也。若言如来不入涅槃，当知是人真我弟子、非魔伴党、正见之人，非恶邪也。

“善男子，我初不见弟子之中有言如来不化众生，默然而住，名般涅槃也。善男子，譬如长者，多有子息，舍至他方，未得还顷，诸子咸谓父已长逝，而是长者实不终没，诸子颠倒皆生没想。声闻弟子亦复如是，不见我故，便谓如来已于拘尸城¹⁰⁰娑罗双树间而般涅槃，而我实不般涅

⁹⁹ 大正藏：亦

¹⁰⁰ 大正藏：拘尸那城；永乐北藏及龙藏：拘尸城

槃也，声闻弟子生涅槃想。

“善男子，譬如明灯，有人覆之，余不知者谓灯已灭，而是明焰实亦不灭。以不知故，生于灭想。声闻弟子亦复如是，虽有慧眼，以烦恼覆令心颠倒，不见真身而便妄生灭度之想，而我实不毕竟灭度。

“善男子，如生盲人不见日月，以不见故，不知昼夜明暗之相；以不知故，便说无有日月之实。实有日月，盲者不见；以不见故，而生倒想，言无日月。声闻弟子亦复如是，如彼生盲，不见如来便谓如来入于涅槃。如来实不入于涅槃，以倒想故生如是心。

“善男子，譬如云雾覆蔽日月，痴人便言无有日月。日月实有，直以覆故，众生不见。声闻弟子亦复如是，以诸烦恼覆智慧眼，不见如来，便言如来入于灭度。善男子，直是如来现婴儿行，非灭度也。

“善男子，如阎浮提，日入之时众生不见，以黑山障故，而是日性实无没入。众生不见，生没入想。声闻弟子亦复如是，为诸烦恼山所障故，不见我身。以不见故，便于如来生灭度想，而我实不毕竟永灭。是故，我于毗舍离国告波旬言：

‘却后三月我当涅槃。’

“善男子，如来悬¹⁰¹见迦叶菩萨却后三月善根当熟；亦见香山须跋陀罗竟安居已，当至我所。是故，我告魔王波旬：‘却后三月当般涅槃。’

“善男子，有诸力士，其数五百，终究三月亦当得发阿耨多罗三藐三菩提心。我为是故，告波旬言：‘却后三月当般涅槃。’

“善男子，如纯陀等及五百离¹⁰²车菴罗果女，却后三月，无上道心善根成熟。为是等故，我告波旬：‘却后三月当般涅槃。’

“善男子，须那刹多亲近外道尼捷¹⁰³子等，我为说法满十二年。彼人邪见，不信不受。我知是人邪见根栽却后三月定可拔断，我为是故告波旬言：‘却后三月当般涅槃。’

“善男子，何因缘故，我于往昔尼连河边告魔波旬：‘我今未有多闻¹⁰⁴弟子，是故不得入于涅槃¹⁰⁵。’？我时欲为五比丘等于波罗捺转法轮故，次复欲为五比丘等，所谓耶奢、富那、毗摩罗阇、憍梵波提、须婆睺，次复欲为郁伽长者等

¹⁰¹ 大正藏：玄

¹⁰² 大正藏：梨

¹⁰³ 大正藏：乾

¹⁰⁴ 大正藏：智

¹⁰⁵ 大正藏：入于涅槃。’者；永乐北藏及龙藏：入于涅槃

五十人，次复欲为摩伽陀国频婆娑罗王等无量人天，次复欲为优楼频螺迦叶门徒五百比丘，次复欲为那提迦叶、伽耶迦叶兄弟二人及五百弟子，次复欲为舍利弗、目犍连¹⁰⁶等二百五十比丘转妙法轮。是故，我告魔王波旬不般涅槃。

“善男子，有名涅槃非大涅槃。云何涅槃非大涅槃？不见佛性而断烦恼，是名涅槃，非大涅槃。以不见佛性故，无常、无我，唯有乐、净，以是义故，虽断烦恼，不得名为大般涅槃¹⁰⁷。若见佛性能断烦恼，是则名为大般涅槃。以见佛性故，得名为常、乐、我、净。以是义故，断除烦恼亦得称为大般涅槃。

“善男子，涅槃者言不，槃者言织¹⁰⁸，不织¹⁰⁹之义名为涅槃。又槃言覆¹¹⁰，不覆之义乃名涅槃。槃言去、来，不去、不来乃名涅槃。槃者言取，不取之义乃名涅槃。槃言不定，定无不定乃名涅槃。槃言新故，无新故义乃名涅槃。槃言障碍，无障碍义乃名涅槃。

“善男子，有优楼迦、迦毗罗弟子等言：‘槃

¹⁰⁶ 大正藏：大目犍连；永乐北藏及龙藏：目犍连

¹⁰⁷ 大正藏：大般涅槃也；永乐北藏及龙藏：大般涅槃

¹⁰⁸ 大正藏：灭

¹⁰⁹ 大正藏：灭

¹¹⁰ 大正藏：槃又言覆；永乐北藏及龙藏：又槃言覆

者名相，无相之义乃名涅槃。’善男子，槃者言有，无有之义乃名涅槃。槃名和合，无和合义乃名涅槃。槃者言苦，无苦之义乃名涅槃。

“善男子，断烦恼者不名涅槃，不生烦恼乃名涅槃。

“善男子，诸佛如来烦恼不起，是名涅槃。所有智慧于法无碍是为如来，如来非是凡夫、声闻、缘觉、菩萨，是名佛性。如来身、心、智慧遍满无量无边阿僧祇土，无所障阂，是名虚空。如来常住，无有变易，名曰实相。以是义故，如来实不毕竟涅槃。

“是名菩萨修大涅槃微妙经典具足成就第七功德。

“善男子，云何菩萨摩訶萨修大涅槃微妙经典具足成就第八功德？

“善男子，菩萨摩訶萨修大涅槃，除断五事，远离五事，成就六事，修习五事，守护一事，亲近四事，信顺一实，心善解脱，慧善解脱。

“善男子，云何菩萨除断¹¹¹五事？所谓五阴：色、受、想、行、识。所言阴者，其义何谓？能

¹¹¹ 大正藏：断除；永乐北藏及龙藏：除断

令众生生死相续，不离重檐¹¹²，分散聚合，三世所摄，求其实义了不可得。以是诸义故，名为阴。菩萨摩訶萨虽见色阴，不见其相。何以故？于十色中推求其性悉不可得，为世界故，说言为阴。受有百八，虽见受阴，初无受相。何以故？受虽百八，理无定实，是故菩萨不见受阴；想、行、识等亦复如是。菩萨摩訶萨深见五阴是生烦恼诸恶根本¹¹³。以是义故，方便令断。

“云何菩萨远离五事？所谓五见。何等为五？一者，身见；二者，边见；三者，邪见；四者，戒取；五者，见取。因是五见生六十二见，因是诸见生死不绝，是故菩萨防护不近。

“云何菩萨成就六事？谓六念处。何等为六？一者，念佛；二者，念法；三者，念僧；四者，念天；五者，念施；六者，念戒。是名菩萨成就六事。

“云何菩萨修习五事？所谓五定：一者，知定；二者，寂定；三者，身心受快乐定；四者，无乐定；五者，首楞严定。修习如是五种定心，则得近于大般涅槃，是故菩萨勤心修习。

¹¹² 大正藏：担

¹¹³ 大正藏：生烦恼之根本也；永乐北藏及龙藏：生烦恼诸恶根本

“云何菩萨守护一事？谓菩提心。菩萨摩诃萨常勤守护是菩提心，犹如世人守护一子，亦如瞎者护余一目，如行旷野守护导者，菩萨守护菩提之心亦复如是。因护如是菩提心故，得阿耨多罗三藐三菩提；因得阿耨多罗三藐三菩提故，常、乐、我、净具足而有，即是无上大般涅槃。是故，菩萨守护一法。

“云何菩萨亲近四事？谓四无量心。何等为四？一者，大慈；二者，大悲；三者，大喜；四者，大舍。因是四心能令无量无边众生发菩提心，是故菩萨系心亲近。

“云何菩萨信顺一实？菩萨了知一切众生皆归一道，一道者谓大乘也。诸佛、菩萨为众生故分之三，是故菩萨信顺不逆。

“云何菩萨心善解脱？贪、恚、痴心永断灭故，是故¹¹⁴菩萨心善解脱。

“云何菩萨慧善解脱？菩萨摩诃萨于一切法知无障阂，是名菩萨慧善解脱。因慧解脱，昔所不闻而今得闻，昔所不见而今得见，昔所不至¹¹⁵而今得至¹¹⁶。”

¹¹⁴ 大正藏：名

¹¹⁵ 大正藏：到

¹¹⁶ 大正藏：到

尔时，光明遍照高贵德王菩萨摩訶萨言：“世尊！如佛所说心解脱者，是义不然。何以故？心本无系。所以者何？是心本性不为贪欲、瞋恚、愚痴、诸结所缚。若本无系，云何而言心善解脱？世尊！若心本性不为贪结之所系者，何等因缘而能得系？如人搆¹¹⁷角，本无乳相，虽加功力，乳无由出。穀于乳者，则不如是，加功虽少，乳则多出。心亦如是，本无贪者，今云何有？若本无贪，后方有者，诸佛、菩萨本无贪相，今悉应有。

“世尊！譬如石女，本无子相，虽加功力，无量因缘，子不可得；心亦如是，本无贪相，虽造众缘，贪无由生。世尊！如钻湿木，火不可得；心亦如是，虽复钻求，贪不可得。云何贪结能系于心？

“世尊！譬如压沙，油不可得；心亦如是，虽复压之，贪不可得。当知贪、心二理各异，设复有之，何能污心？世尊！譬如有人安椽于空，终不得住，安贪于心亦复如是，种种因缘不能令贪系缚于心。

“世尊！若心无贪名解脱者，诸佛、菩萨何故不拔虚空中刺？世尊！过去世心不名解脱，未

¹¹⁷ 大正藏：穀

來世心亦無解脫，現在世心不與道共，何等世心名得解脫？

“世尊！如過去燈不能滅暗，未來世燈亦不滅暗，現在世燈復不滅暗。何以故？明之與暗二不并故。心亦如是，云何而言心得解脫？

“世尊！貪亦是有。若貪無者，見女相時不應生貪。若因女相而得生者，當知是貪真實而有。以有貪故，墮三惡道。

“世尊！譬如有人見畫女像亦復生貪，以生貪故得種種罪。若本無貪，云何見畫而生于貪？若心無貪，云何如來說言菩薩心得解脫？若心有貪，云何見相然後方生？不見相者則不生耶？我今現見有惡果報，當知有貪、瞋恚、愚痴亦復如是。

“世尊！譬如眾生有身無我，而諸凡夫橫計我想。雖有我想，不墮三趣。云何貪者于無女相而起女想，墮三惡道？

“世尊！譬如鑽火¹¹⁸而生于火，然是火性眾緣中無，以何因緣而得生耶？世尊！貪亦如是，色中無貪，香、味、觸、法亦復無貪。云何于色、香、味、觸、法而生貪耶？若眾緣中悉無貪者，

¹¹⁸ 大正藏：木

云何众生独生于贪，诸佛、菩萨而不生耶？

“世尊！心亦不定。若心定者，无有贪欲、瞋恚、愚痴；若不定者，云何而言心得解脱？贪亦不定，若不定者，云何因之生三恶趣？贪者、境界二俱不定。何以故？俱缘一色，或生于贪，或生于瞋，或生愚痴。是故，贪者及与境界二俱不定。若俱不定，何故如来说言：‘菩萨修大涅槃，心得解脱。’”

尔时，世尊告光明遍照高贵德王菩萨摩訶萨言：“善哉！善哉！善男子，心亦不为贪结所系、亦非不系，非是解脱、非不解脱，非有非无，非现在、非过去、非未来。何以故？善男子，一切诸法无自性故。

“善男子，有诸外道作如是言：‘因缘和合则有果生。’若众缘中本无生性而能生者，虚空不生亦应生果。虚空不生非是因故，以众缘中本有果性，是故合集而得生果。所以者何？如提婆达欲造墙壁则取泥土，不取采¹¹⁹色；欲造画像则集采¹²⁰色，不取草木；作衣取缕，不取泥木；作舍取泥，不取缕縑。以人取故，当知是中各能生

¹¹⁹ 大正藏：彩

¹²⁰ 大正藏：彩

果；以能生果故，當知因中必先有性。若無性者，一物之中應當出生一切諸物。若是可取、可作、可出，當知是中必先有果。若無果者，人則不取、不作、不出。唯有虛空無取無作故，能出生一切萬物。以有因故，如尼拘陀子住尼拘陀樹、乳有醍醐、縷中有布、泥中有瓶。

“善男子，一切凡夫無明所盲作是定說：‘色有著義，心有貪性。’復言：‘凡夫心有貪性，亦解脫性。遇貪因緣，心則生貪；若遇解脫，心則解脫。’雖作此說，是義不然。有諸凡夫復作是言：‘一切因中悉無有果。’因有二種：一者，微細；二者，粗大。細則¹²¹是常，粗則無常。從微細因轉成粗因，從此粗因轉復成果。粗無常故，果亦無常。

“善男子，有諸凡夫復作是言：‘心亦無因，貪亦無因，以時節故則生貪心。’如是等輩以不能知心因緣故，輪回六趣，具受生死。

“善男子，譬如枷犬系之于柱，終日繞柱不能得離。一切凡夫亦復如是，被無明枷系生死柱，繞二十五有不能得離。

“善男子，譬如有人墮于圜廁，既得出已而

¹²¹ 大正藏：即

复还入；如人病差，还为病因；如人涉路，值空旷处，既得过已，而复还来；又如净洗还涂泥土；一切凡夫亦复如是，已得解脱无所有处，唯未得脱非非想处，而复还来至三恶趣。何以故？一切凡夫惟观于果，不观因缘。如犬逐块，不逐于人。凡夫之人亦复如是，惟观于果，不观于因缘¹²²。以不观故，从非想退还三恶趣。

“善男子，诸佛、菩萨终不定说因中有果、因中无果及有无果、非有非无果。若言因中先定有果及定无果、定有无果、定非有非无果，当知是等皆魔伴党，系属于魔，即是爱人。如是爱人，不能永断生死系缚，不知心相及以贪相。

“善男子，诸佛菩萨显示中道。何以故？虽说诸法，非有非无，而不决定。所以者何？因眼、因色、因明、因心、因念，识则得生。是识决定不在眼中、色中、明中、心中、念中，亦非中间，非有非无，从缘生故名之为有，无自性故名之为无。是故，如来说言诸法非有非无。

“善男子，诸佛、菩萨终不定说心有净性及不净性，净、不净心无住处故。从缘生贪，故说非无；本无贪性，故说非有。

¹²² 大正藏：不观因缘；永乐北藏及龙藏：不观于因缘

“善男子，从因缘故，心则生贪；从因缘故，心则解脱。善男子，因缘有二：一者，随于生死；二者，随大涅槃。

“善男子，有因缘故，心共贪生共贪俱灭，有共贪生不共贪灭，有不共贪生共贪俱灭，有不共贪生不共贪灭。

“云何心共贪生共贪俱灭？善男子，若有凡夫，未断贪心修习贪心，如是之人心共贪生心共贪灭。一切众生不断贪心，心共贪生心共贪灭。如欲界众生一切皆有初地味禅，若修不修，常得成就，遇因缘故即便得之，言因缘故者，谓火灾也。一切凡夫亦复如是，若修不修，心共贪生心共贪灭。何以故？不断贪故。

“云何心共贪生不共贪灭？声闻弟子有因缘故生于贪心，畏贪心故修白骨观，是名心共贪生不共贪灭。复有心共贪生不共贪灭，如声闻人未证四果，有因缘故生于贪心，证四果时贪心得灭，是名心共贪生不共贪灭。菩萨摩訶萨得不动地时，心共贪生不共贪灭。

“云何不共贪生共贪俱灭？若菩萨摩訶萨断贪心已，为众生故，示现有贪。以示现故，能令无量无边众生咨受善法，具足成就，是名不共

贪生共贪俱灭。

“云何不共贪生不共贪灭？谓阿罗汉、缘觉、诸佛、除不动地其余菩萨，是名不共贪生不共贪灭。以是义故，诸佛菩萨不决定说心性本净、性本不净。

“善男子，是名¹²³不与贪结和合，亦复不与瞋、痴和合。善男子，譬如日月，虽为烟尘云雾及罗睺罗¹²⁴之所覆蔽，以是因缘，令诸众生不能得见。虽不可见，日月之性终不与彼五翳和合。心亦如是，以因缘故生于贪结。众生虽说心与贪合，而是心性实不与合。若是贪心即是贪性，若是不贪即不贪性，不贪之心不能为贪，贪结之心不能不贪。善男子，以是义故，贪欲之结不能污心。

“诸佛、菩萨永破贪结，是故说言心得解脱。一切众生从因缘故，生于贪结；从因缘故，心得解脱。

“善男子，譬如雪山悬峻之处，人与猕猴俱不能行；或复有处，猕猴能行，人不能行；或复有处，人与猕猴二俱能行。善男子，人与猕猴能

¹²³ 大正藏：心

¹²⁴ 大正藏：阿修罗；永乐北藏及龙藏：罗睺罗

行处者，如诸猎师，纯以麝胶置之案上，用捕猕猴。猕猴痴故，往手触之，触已黏¹²⁵手；欲脱手故，以脚踏之，脚复随著；欲脱脚故，以口啮之，口复黏著。如是五处悉无得脱。于是猎师以杖贯之，负还归家。雪山岭处，譬佛菩萨所得正道；猕猴者，譬诸凡夫；猎师者，譬¹²⁶魔波旬；麝胶者，譬贪欲结。人与猕猴俱不能¹²⁷行者，譬诸凡夫、魔王波旬俱不能行。猕猴能行人不能¹²⁸者，譬诸外道有智慧者，诸恶魔等虽以五欲不能系缚；人与猕猴俱能行者，一切凡夫及魔波旬常处生死，不能修行。凡夫之人五欲所缚，令魔波旬自在将去，如彼猎师麝捕猕猴，负之归家。

“善男子，譬如国王安住己界，身心安乐，若至他界则得众苦。一切众生亦复如是，若能自住于己境界则得安乐；若至他界则遇恶魔，受诸苦恼。自境界者，谓四念处；他境界者，谓五欲也。

“云何名为系属于魔？有诸众生，无常见常，常见无常；苦见于乐，乐见于苦；不净见净，净见不净；无我见我，我见无我；非实解脱妄见解

¹²⁵ 大正藏：粘

¹²⁶ 大正藏：喻

¹²⁷ 大正藏：不；永乐北藏及龙藏：不能

¹²⁸ 大正藏：不能行；永乐北藏及龙藏：不能

脱，真实解脱见非解脱；非乘见乘，乘见非乘。如是之人，名系属魔。系属魔者，心不清净。

“复次，善男子，若见诸法真实是有总别定相者¹²⁹，当知是人若见色时便作色相，乃至见识亦作识相，见男男相，见女女相，见日日相，见月月相，见岁岁相，见阴阴相，见入入相，见界界相。如是见者，名系属魔。系属魔者，心不清净。

“复次，善男子，若见我是色、色中有我、我中有色、色属于我，乃至见我是识、识中有我、我中有识、识属于我，如是见者，系属于魔，非我弟子。

“善男子，我声闻弟子远离如来十二部经，修习外道种种¹³⁰典籍，不修出家寂灭之业，纯营世俗在家之事。何等名为在家之事？受畜一切不净之物，奴婢、田宅、象马车乘、驴、骡¹³¹、鸡、犬、猕猴、猪、羊、种种谷麦，远离师僧，亲附白衣，违反圣教，向诸白衣作如是言：‘佛听比丘受畜种种不净之物。’是名修习在家之事。

“有诸弟子不为涅槃，但为利养，亲近听受

¹²⁹ 大正藏：相；永乐北藏及龙藏：相者

¹³⁰ 大正藏：种种外道；永乐北藏及龙藏：外道种种

¹³¹ 大正藏：駝、驴；永乐北藏及龙藏：驴、骡

十二部经，招提僧物及僧鬻物，衣著贪¹³²啖如自己，有，悭惜他家，及以称誉亲近国王及诸王子，卜筮吉凶，推步盈虚，围碁六博，擲菹投壶，亲比丘尼及诸处女，畜二沙弥，常游屠猎、沽¹³³酒之家及旃陀罗所住之处，种种贩卖，手自作食，受使邻国通致信命。如是之人，当知即是魔之眷属，非我弟子。以是因缘，心共贪生心共贪灭，乃至痴心共生共灭亦复如是。

“善男子，以是因缘，心性非¹³⁴净，亦非不净。是故，我说心得解脱。

“若有不受不畜一切不净之物，为大涅槃受持读诵十二部经，书写解说，当知是等真我弟子，不行恶魔波旬境界，即是修习三十七品。以修习故，不共贪生不共贪灭。是名菩萨修大涅槃微妙经典具足成就第八功德。

大般涅槃经卷第二十三

¹³² 大正藏：食；永乐北藏及龙藏：贪

¹³³ 大正藏：酤

¹³⁴ 大正藏：不

大般涅槃经卷第二十四

北凉天竺三藏昙无讖译 梵

宋沙门慧严慧观同谢灵运再治

高贵德王菩萨品第二十二之六¹³⁵

“复次，善男子，云何菩萨摩訶萨修大涅槃微妙经典具足成就第九功德？”

“善男子，菩萨摩訶萨修大涅槃微妙经典，初发五事悉得成就。何等为五？一者，信；二者，直心；三者，戒；四者，亲近善友；五者，多闻。

“云何为信？菩萨摩訶萨信于三宝，施有果报；信于二谛一乘之道，更无异趣，为诸众生速得解脱，诸佛菩萨分别为三；信第一义谛；信善方便。是名为信。如是信者，若诸沙门，若婆罗门，若天、魔、梵，一切众生所不能坏。因是信故，得圣人性。修行布施若多若少，悉得近于大般涅槃，不堕生死；戒、闻、智慧亦复如是。是名为信。虽有是信而亦不见，是为菩萨修大涅槃成就初事。

“云何直心？菩萨摩訶萨于诸众生作质直

¹³⁵ 大正藏：光明遍照高贵德王菩萨品之六

心。一切众生若遇因缘则生谄曲，菩萨不尔。何以故？善解诸法悉因缘故。菩萨摩訶萨虽见众生诸恶过咎，终不说之。何以故？恐生烦恼，若生烦恼则堕恶趣。如是菩萨若见众生有少善事，则赞叹之。云何为善？所谓佛性。赞佛性故，令诸众生发阿耨多罗三藐三菩提心。”

尔时，光明遍照高贵德王菩萨摩訶萨白佛言：“世尊！如佛所说：‘菩萨摩訶萨赞叹佛性，令无量众生发阿耨多罗三藐三菩提心。’是义不然。何以故？如来初开涅槃经时，说有三种：一者，若有病人得良医药及瞻病者，病则易差，如其不得则不可愈；二者，若得、不得，悉不可差；三者，若得、不得，悉皆自¹³⁶差。一切众生亦复如是，若遇善友、诸佛菩萨闻说妙法，能发阿耨多罗三藐三菩提心，如其不遇则不能发，所谓须陀洹、斯陀含、阿那含、阿罗汉、辟支佛。二者，虽遇善友、诸佛菩萨闻说妙法，亦不能发，若其不遇亦不能发，谓一阐提。三者，若遇、不遇，一切悉能发阿耨多罗三藐三菩提心，所谓菩萨。若言遇与不遇悉发阿耨多罗三藐三菩提心者，如来今者云何说言，因赞佛性令诸众生发阿耨多罗

¹³⁶ 大正藏：可

三藐三菩提心？

“世尊！若遇善友、诸佛菩萨闻说妙法及以不遇，悉不能发阿耨多罗三藐三菩提心，当知是义亦复不然。何以故？如是之人当得阿耨多罗三藐三菩提故。一阐提辈以佛性故，若闻、不闻，悉亦当得阿耨多罗三藐三菩提故。

“世尊！如佛所说，何等名为一阐提¹³⁷？谓断善根。如是之义亦复不然。何以故？不断佛性故。如是佛性理不可断，云何佛说断诸善根？如佛往昔说十二部经，善有二种：一者，常；二者，无常。常者不断，无常者断。无常可断，故堕地狱；常不可断，何故不遮？佛性不断非一阐提，如来何故作如是说言一阐提？世尊！若因佛性发阿耨多罗三藐三菩提¹³⁸，何故如来广为众生说十二部经？

“世尊！譬如四河出阿耨达池，若有天、人、诸佛世尊说言：‘是河不入大海，当还本源。’无有是处。菩提之心亦复如是。有佛性者，若闻、不闻，若戒、非戒，若施、非施，若修、不修，若智、非智，悉皆应得阿耨多罗三藐三菩提。

¹³⁷ 大正藏：一阐提耶；永乐北藏及龙藏：一阐提

¹³⁸ 大正藏：菩提心；永乐北藏及龙藏：菩提

“世尊！如优陀延山，日从中出至于正南。日若念言‘我不至西，还东方’者，无有是处。佛性亦尔，若不闻、不戒、不施、不修、不智、不得阿耨多罗三藐三菩提者，无有是处。”

“世尊！诸佛如来说因果性非有非无，如是之义是亦不然。何以故？如其乳中无酪性者，则无有酪；尼拘陀子无五丈性者¹³⁹，则不能生五丈之质。若佛性中无阿耨多罗三藐三菩提树者，云何能生阿耨多罗三藐三菩提树？以是义故，所说因果非有非无，如是之义云何相应？”

尔时，世尊赞言：“善哉，善哉。善男子，世有二人甚为希有，如优昙华：一者，不行恶法；二者，有罪能悔。如是之人，甚为希有。复有二人：一者，作恩；二者，念恩。复有二人：一者，咨受新法；二者，温故不忘。复有二人：一者，造新；二者，修故。复有二人：一，乐闻法；二，乐说法。复有二人：一，善问难；二，善能答。善问难者，汝身是也；善能答者，谓如来也。善男子，因是善问即得转于无上法轮，能枯十二因缘大树，能度无边生死大海¹⁴⁰，能与魔王波旬共

¹³⁹ 大正藏：者；永乐北藏及龙藏：性者

¹⁴⁰ 大正藏：河

战，能摧波旬所立胜幢。

“善男子，如我上¹⁴¹说：‘三种病人，值遇良医、瞻病、好药及以不遇，病悉得差。’是义云何？若得、不得，谓定寿命。所以者何？是人已于无量世中修三种善，谓上、中、下，以修如是三种善故，得定寿命。如郁单越人寿命千年。有遇病者，若得良医、好药、瞻病及以不得，悉皆得差。何以故？得定命故。

“善男子，如我所说：‘若有病人，得遇良医、好药、瞻病，病得除差；若不遇者，则不得差。’是义云何？善男子，如是之人寿命不定，命虽不尽，有九因缘能夭其寿。何等为九？一者，知食不安而反食之；二者，多食；三者，宿食未消而复更食；四者，大小便利不随时节；五者，病时不随医教；六者，不随瞻病教勅；七者，强耐不吐；八者，夜行，以夜行故，恶鬼打之；九者，房室过差。以是缘故，我说：‘病者若遇医药病则可差，若不遇者则不可愈。’

“善男子，如我上¹⁴²说‘若遇、不遇，俱不差’者，是义云何？有人命尽，若遇、不遇，悉

¹⁴¹ 大正藏：先

¹⁴² 大正藏：先

不可差。何以故？以命尽故。以是义故，我说：‘病人若遇医药及以不遇，悉不得差。’

“众生亦尔，发菩提心者，若遇善友、诸佛菩萨咨受深法，若不遇之，皆悉当成。何以故？以其能发菩提心故，如郁单越人得定寿命。

“如我所说：‘从须陀洹至辟支佛，若闻善友、诸佛菩萨所说深法，则发阿耨多罗三藐三菩提心；若不值遇诸佛菩萨闻说深法，则不能发阿耨多罗三藐三菩提¹⁴³。’如不定命，以九因缘，命则中夭。如彼病人，值遇医药，病则得差；若不遇者，病则不差。是故，我说遇佛菩萨闻说深法则能发心；若不值遇，则不能发。

“如我上¹⁴⁴说：‘若遇善友、诸佛菩萨闻说深法，若不值遇，俱不能发。’是义云何？善男子，一阐提辈，若遇善友、诸佛菩萨闻说深法及以不遇，俱不得离一阐提心。何以故？断善法故。一阐提辈亦得阿耨多罗三藐三菩提，所以者何？若能发于菩提之心则不复名一阐提也。

“善男子，以何缘故说一阐提得阿耨多罗三藐三菩提？一阐提辈实不得¹⁴⁵阿耨多罗三藐三

¹⁴³ 大正藏：菩提心；永乐北藏及龙藏：菩提

¹⁴⁴ 大正藏：先

¹⁴⁵ 大正藏：不能得；永乐北藏及龙藏：不得

菩提，如命尽者，虽遇良医、好药、瞻病，不能得差。何以故？以命尽故。

“善男子，一阐，名信；提，名不具。信不具故¹⁴⁶，名一阐提。佛性非信，众生非具，以不具故，云何可断？一阐，名善方便；提，名不具。修善方便不具足故，名一阐提。佛性非是修善方便，众生非具，以不具故，云何可断？一阐，名进；提，名不具。进不具故，名一阐提。佛性非进，众生非具，以不具故，云何可断？一阐，名念；提，名不具。念不具故，名一阐提。佛性非念，众生非具，以不具故，云何可断？一阐，名定；提，名不具。定不具故，名一阐提。佛性非定，众生非具，以不具故，云何可断？一阐，名慧；提，名不具。慧不具故，名一阐提。佛性非慧，众生非具，以不具故，云何可断？一阐，名无常善；提，名不具。以无常善不具足故，名一阐提。佛性是常¹⁴⁷，非善非不善。何以故？善法要从方便而得，而是佛性非方便得，是故非善。何故复名非不善耶？能得善果故，善果即是阿耨多罗三藐三菩提。又，善法者生已得故，而是佛

¹⁴⁶ 大正藏：不具信故；永乐北藏及龙藏：信不具故

¹⁴⁷ 大正藏：佛性非无常；永乐北藏及龙藏：佛性是常

性非生已得，是故非善。以斷生得諸善法故，名一闍提。

“善男子，如汝所言：‘若一闍提有佛性者，云何不遮地獄之罪？’善男子，一闍提中無有佛性。善男子，譬如有王聞箜篌音，其聲清妙，心即耽著，喜樂愛念，情無舍離。即告大臣：‘如是妙音從何處出？’大臣答王¹⁴⁸：‘如是妙音從箜篌出。’王復語言：‘持是聲來。’爾時，大臣即持箜篌置於王前，而作是言：‘大王當知，此即是聲。’王語箜篌：‘出聲！出聲！’而是箜篌聲亦不出。爾時，大王即斷其弦，聲亦不出；取其皮木，悉皆析裂，推求其聲，了不能得。爾時，大王即瞋大臣：‘云何乃作如是妄語？’大臣白王：‘夫取聲者，法不如是。應以眾緣善巧方便，聲乃出耳。’眾生佛性亦復如是，無有住處，以善方便故得可見；以可見故，得阿耨多羅三藐三菩提。一闍提輩不見佛性，云何能遮三惡道罪？善男子，若一闍提信有佛性，當知是人不至三趣，是亦不名一闍提也。以不自信有佛性故，即墮三趣；墮三趣故，名一闍提。

“善男子，如汝所說：‘若乳無酪性，不應

¹⁴⁸ 大正藏：言

出酪；尼拘陀子无五丈性，则不应有五丈之质。’愚痴之人作如是说，智者终不发如是言。何以故？以无性故。善男子，如其乳中有酪性者，不应复假众缘力也。善男子，如水乳杂，卧至一月，终不成酪。若以一涕颇求树汁，投之于中即便成酪。若本有酪，何故待缘？众生佛性亦复如是，假众缘故则便可见，假众缘故得成阿耨多罗三藐三菩提。若待众缘然后成者，即是无性；以无性故，能得阿耨多罗三藐三菩提。善男子，以是义故，菩萨摩訶萨常赞人善，不讼彼缺，名质直心。

“复次，善男子，云何菩萨质直心耶？菩萨摩訶萨常不犯恶，设有过失即时忏悔，于师、同学终不覆藏，惭愧自责，不敢复作，于轻罪中生极重想。若人诘问，答言：‘实犯。’复问：‘是罪为好？不好？’答言：‘不好。’复问：‘是罪为善？不善？’答言：‘不善。’复问：‘是罪是善果耶？不善果乎¹⁴⁹？’答言：‘是罪实非善果。’又问：‘是罪谁之所造？将非诸佛、法、僧所作？’答言：‘非佛、法、僧，我所作也，乃是烦恼之所构¹⁵⁰集。’以直心故，信有佛性；信佛性故，

¹⁴⁹ 大正藏：耶

¹⁵⁰ 大正藏：构

则不得名一阐提也。以直心故，名佛弟子，若受众生衣服、饮食、卧具、医药，种各十¹⁵¹万，不足为多。是名菩萨质直心也。

“云何菩萨修治于戒？菩萨摩訶萨受持禁戒，不为生天，不为恐怖，乃至不受狗戒、鸡戒、牛戒、雉戒，不作破戒，不作缺戒，不作瑕戒，不作杂戒，不作声闻戒，受持菩萨摩訶萨戒、尸罗波罗蜜戒，得具足戒不生憍慢，是名菩萨修大涅槃具第三戒。

“云何菩萨亲近善友？菩萨摩訶萨常为众生叹说¹⁵²善道，不说恶道，说于恶道非善果报。善男子，我身即是一切众生真善知识，是故能断富伽罗婆罗门所有邪见。善男子，若有众生亲近我者，虽有应生地狱因缘即得生天。如须那刹多等应堕地狱，以见我故，即得断除地狱因缘，生于色天。虽有舍利弗、目犍¹⁵³连等，不名众生真善知识。何以故？生一阐提心因缘故。善男子，我昔住于波罗柰¹⁵⁴国时，舍利弗教二弟子：一观白骨，一令数息，经历多年，皆不得定。以是因缘，即生邪见，言：‘无涅槃无漏之法。若其有

¹⁵¹ 大正藏：千

¹⁵² 大正藏：说于；永乐北藏及龙藏：叹说

¹⁵³ 大正藏：犍

¹⁵⁴ 大正藏：捺

者，我应得之。何以故？我能善持所受戒故。’我于尔时见是比丘生此邪心，唤舍利弗而呵责¹⁵⁵之：‘汝不善教，云何乃为是二弟子颠倒说法？汝二弟子其性各异：一主澣¹⁵⁶衣，一是金师。金师之子应教数息，澣¹⁵⁷衣之人应教骨观。以汝错教，令是二人生于恶邪。’我于尔时，为是二人如应说法，二人闻已，得阿罗汉果。是故，我为一切众生真善知识，非舍利弗、目犍¹⁵⁸连等。若使众生有极重结得遇我者，我以方便即为断之。如我弟难陀有极重欲，我以种种善巧方便而为除之¹⁵⁹；鸯掘魔罗有重瞋恚，以见我故，瞋恚即断；阿阇世王有重愚痴，以见我故，痴心即灭；如婆熙伽长者，于无量劫积集成就极重烦恼，以见我故，即便断灭。设有弊恶厮下之人，亲近于我作弟子者，以是因缘，一切人天恭敬爱念。尸利鞞多邪见炽盛，因见我故，邪见即灭。因见我故，断地狱因，作生天缘，如气嘘旃陀罗。命垂终时，因见我故，还得寿命，如憍尸迦。狂心错乱，因见我故，还得本心，如瘦瞿昙弥。屠家之子，常

¹⁵⁵ 大正藏：喷

¹⁵⁶ 大正藏：浣

¹⁵⁷ 大正藏：浣

¹⁵⁸ 大正藏：犍

¹⁵⁹ 大正藏：断

作恶业，以见我故，即便舍离，如阐提比丘。因见我故，宁舍身命，不毁禁戒，如草系比丘。以是义故，阿难比丘说：‘半梵行名善知识。’我言：‘不尔，具足梵行乃名善知识。’是名菩萨修大涅槃具足第四亲善知识。

“云何菩萨摩訶萨¹⁶⁰具足多闻？菩萨¹⁶¹为大涅槃，十二部经书写读诵，分别解说，是名菩萨具足多闻。除十一部经¹⁶²，惟¹⁶³毗佛略，受持读诵，书写解说，亦名菩萨具足多闻。除十二部经，若能受持是大涅槃微妙经典，书写读诵，分别解说，是名菩萨具足多闻。除是经典，具足全体，若能受持一四句偈；复除是偈，若能受持如来常住性无变易，是名菩萨具足多闻。复除是事，若知如来常不说法，亦名菩萨具足多闻。何以故？法无性故。如来虽说一切诸法，常无所说，是名菩萨修大涅槃成就第五具足多闻。

“善男子，若有善男子、善女人，为大涅槃具足成就如是五事，难作能作，难忍能忍，难施能施。云何菩萨难作能作？若闻有人食一胡麻得阿耨多罗三藐三菩提者，信是语故，乃至无量阿

¹⁶⁰ 大正藏：菩萨：永乐北藏及龙藏：菩萨摩訶萨

¹⁶¹ 大正藏：菩萨摩訶萨：永乐北藏及龙藏：菩萨

¹⁶² 大正藏：十一部：永乐北藏及龙藏：十一部经

¹⁶³ 大正藏：唯

僧祇劫常食一麻；若聞入火得阿耨多羅三藐三菩提者，于無量劫在阿鼻獄入熾火聚，是名菩薩難作能作。云何菩薩難忍能忍？若聞受苦手杖、刀、石斫打因緣得大涅槃，即于無量阿僧祇劫，身具受之，不以為苦，是名菩薩難忍能忍。云何菩薩難施能施？若聞能以國城、妻子、頭目、髓腦惠施于人得阿耨多羅三藐三菩提者，即于無量阿僧祇劫，以其所有國城、妻子、頭目、髓腦惠施于人，是名菩薩難施能施。菩薩雖復難作能作，終不念言：‘是我所作。’難忍難施¹⁶⁴亦復如是。善男子，譬如父母惟¹⁶⁵有一子，愛之甚重，以好衣裳、上妙甘饈，隨時將養，令無所乏。設令其子于父母所起輕慢心，惡口罵辱，父母愛故，不生瞋恨，亦不念言：‘我与是兒衣服、飲食。’菩薩摩訶薩亦復如是，視諸眾生猶如一子，若子遇病，父母亦病，為求醫藥，勤加救療，病既差已，終不生念：‘我為是兒療治病苦。’菩薩亦爾，見諸眾生遇煩惱病，生愛念心而為說法，以聞法故，諸煩惱斷，煩惱斷已，終不念言：‘我為眾生斷諸煩惱。’若生此念，終不得成阿耨多羅三藐三

¹⁶⁴ 大正藏：難施能施：永樂北藏及龍藏：難忍難施

¹⁶⁵ 大正藏：唯

菩提。唯作是念：‘无一众生我为说法令断烦恼。’菩萨摩訶萨于诸众生不瞋不喜。何以故？善能修习空三昧故。菩萨若修空三昧者，当于谁所生瞋生喜？善男子，譬如山林，猛火所焚，若人斫伐，或为水漂，而是林木当于谁所生瞋生喜？菩萨摩訶萨亦复如是，于诸众生无瞋无喜。何以故？修空三昧故。”

尔时，光明遍照高贵德王菩萨¹⁶⁶白佛言：“世尊！一切诸法性自空耶？空空故空。若性自空者，不应修空，然后见空。云何如来言以修空而见空耶？若性自不空，虽复修空，不能令空。”

“善男子，一切诸法性本自空。何以故？一切法性不可得故。善男子，色性不可得。云何色性？色者¹⁶⁷，非地、水、火、风，不离地、水、火、风；非青、黄、赤、白，不离青、黄、赤、白；非有非无。云何当言色有自性？以性不可得故，说为空。一切诸法亦复如是，以相似相续故，凡夫见已，说言：‘诸法性不空寂。’菩萨摩訶萨具足五事，是故见法性本空寂。善男子，若有沙门及婆罗门见一切法性不空者，当知是人非是沙

¹⁶⁶ 大正藏：菩萨摩訶萨；永乐北藏及龙藏：菩萨

¹⁶⁷ 大正藏：色性者；永乐北藏及龙藏：色者

门、非婆罗门，不得修习般若波罗蜜，不得入于大般涅槃，不得现见诸佛菩萨，是魔眷属。

“善男子，一切诸法性本自空，亦因菩萨修习空故，见诸法空。善男子，如一切法性无常故，灭能灭之；若非无常，灭不能灭。有为之法有生相故，生能生之；有灭相故，灭能灭之。一切诸法有苦相故，苦能令苦。善男子，如盐性咸¹⁶⁸，能咸¹⁶⁹异物；石蜜性甘，能甘异物；苦酒性醋¹⁷⁰，能醋¹⁷¹异物；姜本性辛，能辛异物；呵梨勒苦，能苦异物；菴罗果淡，能淡异物；毒性能害，令异物害；甘露之性令人不死，若合异物亦能不死。菩萨修空亦复如是，以修空故，见一切法性皆空寂。”

光明遍照高贵德王菩萨复作是言：“世尊！若盐能令非碱作碱，修空三昧若如是者，当知是定非善非妙，其性颠倒。若空三昧唯见空者，空是无法，为何所见？”

“善男子，是空三昧见不空法能令空寂，然非颠倒。如盐，非碱作碱；是空三昧亦复如是，不空作空。善男子，贪是有性，非是空性。贪若

¹⁶⁸ 大正藏：碱

¹⁶⁹ 大正藏：碱

¹⁷⁰ 大正藏：酢

¹⁷¹ 大正藏：酢

是空，众生不应以是因缘堕于地狱。若堕地狱，云何贪性当是空耶？善男子，色性是有。何等是¹⁷²性？所谓颠倒，以颠倒故，众生生贪。若是色性非颠倒者，云何能令众生生贪？以生贪故，当知色性非不是有。以是义故，修空三昧非颠倒也。

“善男子，一切凡夫，若见女人即生女相；菩萨不尔，虽见女人，不生女相；以不生相，贪则不生；贪不生故，非颠倒也。以世间人见有女故，菩萨随说言有女人。若见男时，说言是女，则是颠倒。是故，我为阎提说言：‘汝婆罗门，若以昼为夜，是即颠倒；以夜为昼，是亦颠倒。’昼为昼相，夜为夜相¹⁷³，云何颠倒？善男子，一切菩萨住九地者见法有性，以是见故，不见佛性。若见佛性，则不复见一切法性。以修如是空三昧故，不见法性；以不见故，则见佛性。诸佛菩萨有二种说：一者，有性；二者，无性。为众生故，说有法性；为诸贤圣，说无法性。为不空者见法空故，修空三昧令得见空；无法性者，亦修空故空。以是义故，修空见空。

“善男子，汝言‘见空，空是无法，为何所

¹⁷² 大正藏：色

¹⁷³ 大正藏：相；永乐北藏：相；龙藏：根

见¹⁷⁴？’者，善男子，如是！如是！菩萨摩訶萨实无所见。无所见者，即无所有；无所有者，即一切法。菩萨摩訶萨修大涅槃，于一切法悉无所见。若有见者，不见佛性，不能修习般若波罗蜜，不得入于大般涅槃。是故，菩萨见一切法性无所有。善男子，菩萨不但因见三昧而见空也，般若波罗蜜亦空、禅波罗蜜亦空、毗梨耶波罗蜜亦空、羼提波罗蜜亦空、尸波罗蜜亦空、檀波罗蜜亦空，色亦空、眼亦空、识亦空、如来亦空、大般涅槃亦空。是故，菩萨见一切法皆悉是空。是故，我在迦毗罗城告阿难言：‘汝莫愁恼、悲号¹⁷⁵、啼哭。’阿难即言：‘如来世尊！我今亲属悉皆殄灭，云何当得不悲泣耶？如来与我俱生此城，俱同释种亲戚眷属，云何如来独不愁恼，光颜更显？’善男子，我复告言：‘阿难，汝见迦毗罗城真实是有，我见空寂，悉无所有。汝见释种悉是亲戚，我修空故，悉无所见。以是因缘，汝生愁苦，我身容颜益更光显。’诸佛菩萨修习如是空三昧故，不生愁恼。是名菩萨修大涅槃微妙经典成就具足第九功德。

¹⁷⁴ 大正藏：见：永乐北藏及龙藏：所见

¹⁷⁵ 大正藏：泣

“复次，善男子¹⁷⁶，云何菩萨修大涅槃微妙经典具足最后第十功德？善男子，菩萨修习三十七品，入大涅槃常、乐、我、净，为诸众生分别解说大涅槃经，显示佛性。若须陀洹、斯陀含、阿那含、阿罗汉、辟支佛、菩萨信是语者，悉得入于大般涅槃；若不信者，轮回生死。”

尔时，光明遍照高贵德王菩萨白佛言：“世尊！何等众生于是经中不生恭敬？”

“善男子，我涅槃后，有声闻弟子愚痴破戒，喜生斗诤，舍十二部经，读诵种种外道典籍、文颂手笔，受畜一切不净之物，言是佛听。如是之人，以好栴檀贸易凡木，以金易鍮石、银易白镮、绢易麩毳¹⁷⁷、以甘露味易于恶毒。云何栴檀贸易凡木？如我弟子，为供养故，向诸白衣演说经法，白衣情逸，不喜听闻，白衣处高，比丘在下，兼以种种肴饍饮食而供给之，犹不肯听，是名栴檀贸易凡木。云何以金贸易鍮石？鍮石譬色、声、香、味、触，金以譬戒。我诸弟子以色因缘破所受戒，是名以金贸易鍮石。云何以银易于白镮？银譬十善，镮譬十恶。我诸弟子放舍十善，行十

¹⁷⁶ 大正藏：善男子；永乐北藏及龙藏：复次，善男子

¹⁷⁷ 大正藏：褐（后同）

恶法，是名以银贸易白鬘。云何以绢贸易麩毳？麩毳以譬无惭无愧，绢譬惭愧。我诸弟子放舍惭愧，习无惭愧，是名以绢贸易麩毳。云何甘露贸易毒药？毒药以譬种种供¹⁷⁸养，甘露以譬诸无漏法。我诸弟子为利养故，向诸白衣苦自誉赞¹⁷⁹，言得无漏，是名甘露贸易毒药。以如是等恶比丘故，是大涅槃微妙经典广行流布于阎浮提，当是之时，有诸弟子受持读诵、书写是经、演¹⁸⁰说流布，当为如是诸恶比丘之所杀害。时¹⁸¹恶比丘，相与聚会，共立严制：‘若有受持大涅槃经，书写读诵，分别说者，一切不得共住、共坐、谈论语言。何以故？涅槃经者，非佛所说，邪见所造。邪见之人即是六师，六师所说非佛经典。所以者何？一切诸佛悉说诸法无常、无我、无乐、无净，若言诸法常、乐、我、净，云何当是佛所说经？诸佛菩萨听诸比丘畜种种物，六师所说不听弟子畜一切物，如是之义云何当是佛之所说？诸佛菩萨不制弟子断牛五味及以食肉，六师不听食五种盐、五种牛味及以脂血，若断是者，云何当是佛之正典？诸佛菩萨演说三乘，而是经中纯说一乘

¹⁷⁸ 大正藏：利

¹⁷⁹ 大正藏：若自举赞：永乐北藏及龙藏：苦自誉赞

¹⁸⁰ 大正藏：广

¹⁸¹ 大正藏：是

谓大涅槃，如此之言云何当是佛之正典？诸佛毕竟入于涅槃，是经言佛常、乐、我、净，不入涅槃，是经不在十二部数，即是魔说，非是佛说。’

“善男子，如是之人虽我弟子，不能信顺是涅槃经。善男子，当尔之时，若有众生信此经典乃至半句，当知是人真我弟子。因如是信，即见佛性，入于涅槃。”

尔时，光明遍照高贵德王菩萨白佛言：“世尊！善哉！善哉！如来今日善能开示大涅槃经。世尊！我因是事即得悟解大涅槃经一句、半句，以解一句至半句故少见¹⁸²佛性。如佛所说，我亦当得入大涅槃。”

“是名菩萨修大涅槃微妙经典具足成就第十功德。”

大般涅槃经卷第二十四

¹⁸² 大正藏：见少：永乐北藏及龙藏：少见

● 结诵仪

补阙真言

(三遍)

南無喝啰怛那. 哆罗夜耶. 佉啰佉啰. 俱住俱住. 摩啰摩啰. 虎啰. 吽. 贺贺. 苏怛拿. 吽. 泼抹拿. 娑婆诃.

南無佛 南無法 南無僧 (合掌三称)

南無一切如来、应、正等觉 (合掌三称)

南無本师释迦牟尼佛 (合掌三称)

南無大般涅槃经 (合掌三称)

发愿文

(一遍)

志心忏悔。我(某甲)与一切众生，从无始来，迷失真心，流转生死，六根罪障，无量无边，圆妙佛乘，无以开解，一切所愿，不得现前。我今读诵大般涅槃经，以此善根，发露黑恶，过、现、

未来三业所造无边重罪，皆得消灭，身心清净，惑障蠲除，福智庄严，净因增长，自他行愿速得圆成。愿诸如来常在说法，所有功德起随喜心，回向菩提，证常乐果。命终之日，正念现前，面见弥陀及诸圣众，一刹那顷，生莲华中。普愿众生，俱成佛道。

回向偈

(一遍)

诵经功德殊胜行 无边胜福皆回向
普愿沉溺诸有情 速往无量光佛刹
十方三世一切佛 一切菩萨摩訶萨
摩訶般若波罗蜜

回向偈

(一遍)

愿以此功德 庄严佛净土
上报四重恩 下济三途苦
若有见闻者 悉发菩提心
尽此一报身 同生极乐国

三皈依

(一遍)

自皈依佛，当愿众生，体解大道，发无上心。
自皈依法，当愿众生，深入经藏，智慧如海。自
皈依僧，当愿众生，统理大众，一切无碍，和南
圣众。



此咒置经书中可灭误跨之罪

南无护法韦驮尊天菩萨

